

# OOWUULIWA MURU



Kooxukhuru, Munna Neville. Mureerihiwe!

<sup>2</sup> Mooxeleliwa, apatthani. Ti yooreera okhala va voosisi'ula. Ni kinoona wira kiihira e . . . kirimwiikelihha m'okathini mwa Munna Neville. Okilaanthe ottuli iwe ni yawawe, atthokihaka yoosoma awe; nto miyo khuvolowa, owo khupacerya okhuna yoosoma awe, nto khwira, "Vooreera . . ."

<sup>3</sup> Enikuupuxerya miyaakha sivinre. Aahikhala munna mmosa ooriipa va, oniitthaniwa Munna Smith, ni Munna Cross muthiyana. Awo yaari apatthani aka ooreera murima saana. Nto kaaviraka mpaani ohiyu, mutokweene owo aani . . . Aahikhalana ipwetupwetu sooteela. Nkisuwenle sintoko ookhala a nyuwo onimuupuwela, wala nnari. Ni owo aari vaplataforma, nyuwo moosuwela. Ni othene aya yaamwiipa, "Yookhala Ephiro Enrowa Wirimu." Nto Munna Smith, aakilaathiki *sa*, moosuwela. Nto miyo kaavolowaka mukhora wa wiithela.

<sup>4</sup> Aahikhala mwaaruusi mmosa, ooriipa saana, aakilaathiki vanloothoni. Owo aampacerya woopa ikuphwi, iiraka, "Munvuwihe Yoowo," nsipo nenlo, moosuwela. Awo anhelela erumihelo aya mwa yeeyo, moosuwela. Vano nto vanloothoni ninttharelana, mutthu mukina, aamwiira, aamutthikela, "Munvuwihe Yoowo." Ahe, ti yeeyo awo yiipaaya okathi waavolowaaka vamukhora. Miyo okisivela nikhuru nlo n'atthu.

<sup>5</sup> Nto siiso Munna Smith mutokweene aakilaathiki ottuli iwe, vakhani, moosuwela, ni owo aari muthinto wa mutthu oomaala. Owo aamwiira, "Volowani, humu, mmumulihe exapheyo anyu." Kahi "mmumule"; "mmumulihe exapheyo anyu" moone. "Volowani, humu, mmumulihe exapheyo anyu." Owo aawela vale, ni, miyo kaanisuwela enamuna owo aapaceryawe, yaakilipelela, moone.

<sup>6</sup> Owo aamwiira, "Ahe," owo aamwiira, "anamwane, moosuwela," aamwiira, "Miyo—miyo kaakilaanthe va kii kohaka paahi, 'Pwiya, munrowa okinnya exeeni wira kihimye?'" Aamwiira, "Owo—Owo—Owo aakhala attikinyaka muru Awe, attikinyaka muru Awe akiwehaka. 'Miyo nkinrowa owunnyi etthu yo ohimya.'" Khwira, owo aamwiira, "Koomoona Humu Branham ovolowa wiithela iwe, nto miyo khwira, vano, 'Pwiya, miyo kinoopacerya wuupuwela. . .'" Ahe, miyo kaahisuwela wira yaamukiitthana!

<sup>7</sup> Munna George Wright, ehaali anyu, munna? [Munna Wright oniira, "Oh, oreera. Vekeekhai."—Mol.] Mureerihiwe, Munna Wright! Vekeekhai. ["Munna Elijah ori ottuli iwe."] Oh, ti siiso? Munna Elij' Perry, owo oohimya, ori ottuli nno. Muri vayi, Munna Elij'? Miyo nkimoonale owo mwa okathi munci-

ene. . . Ahe, wulu, Muluku aka! Vano tthiri ninrowa okhalana muthukumano w'ekeekhai va! Elij' Perry, George Wright, ni akina wa atokweene awo yaakhalaka vaava okathi naahalelahu okhala oovarelelaka ivenesiyaana voopuroni, ni matat'ahu, ettheke erumaka. Ti yooreera owoonani! Maama, Munna Wright muthiyana ori ni nyuwo? Munna Wright muthiyana ohoorwa? Owo ori ottuli iwe, nave. Ayo, mulopwana. Ahe, ti yooreera! Munna Perry muthiyana, kinniwoona othene aya vano. Ahe, eyo ti yooreera saana. Ti yooreera okhala va. Ti yooreera okilaathi mapuro ala. Ti yooreera okhala vamosa.

<sup>8</sup> Miyo kaahitthokiha, saana, otthika; waari muritti vamurimani. Kinoomala-ru otthika wAfrika, ntoko nyuwo othene munsuwelanyu. Ni vaphiyale aka weiwe, eviisa yaahikhoottiheriwa, ni nkaahiiwe, nkaahiiwe olaleya okhala wira enaathukumanya atthu anci-ene. Awo anwehererya okhala ekhotto wu khula okathi, ni—ni awo—awo khiyaakitthunihenrye olaleya okhala wira enaathukumanya atthu anci-ene vamosa. Enamuna emosa paahi kaakhanlyaka wiiraka, waarowa okhala mutthenkeso onthoonyeriwa ni kuveerunu, mwa kuveerunu, okilattula orowa weiwe, nto eyo mmansaya yaammwiiriha kuveerunu waaveleeliha mamiliisiya wira ekhapelele. Moone, awo paahi. . . Enoorowa okhala-wo ekhotto paahi, ni khiva mahove. Eri vakhiviru tu, moone. Mulopwan'owo a kuveerunu ohimnye wira, "Emaara yookiserya owo aaryawe wenna, owo aahaathukumanya epantte ya neexexe y'atthu emilyawu ntero." Ni ohimnye wira, "Nto, munnoona, eyo yaarowa okhala etthu ene komunismu onwehereryawe, wira ekhale ekhotto." Tivo, nkaawenrye olaleya.

<sup>9</sup> Atthu awo yeemenle vale, attikinyaka matata aya, ni yinlaka, "Nwuupuwele ame aka! Mmuupuwele, munn'aka okhwiiye! Awaka. . ." Iwe, ni wiithela wa iwalelo, moosuwela, iwalelo sa araame farpaatu, ni eyo enniwoonihani ohikhala saana. Nto kitthikela owaani.

<sup>10</sup> Nto miyo kuupuwela, "Ahe. . ." Mwan'aka, Joseph, ottuli iwe, aaronyoonyeriwa vakhani osoma wawe. Ni aahi. . . Owo aahiwerya ovira, masi aahaana otthikela; khaasoma oratteene voophiyerya. Tivo miyo khuupuwela, "Ahe, nihaana orowa okhala owaani okathi vakhani." Nto miyo khwira, "Nakhala-ru owaani, enoorowa ohonona wiitthyuuwa w'anamwane." Tivo hiyo ninteerya paahi, nto nimuroiha nipuro nikina Akostu, ni ohiya. . . ni ninootthikela wenna isumana piili, tthaaru.

<sup>11</sup> Miyo khwira, "Kookupali wira, niryeeene weiwo, kinookhalana muthukumano. Ninoomphwanya autitooriyu ole a oxikola nno, ni—ni ninookhalana muthukumano okhuma mahiku miloko miili ni mathanu na mararu mpakha nihiku noopacerya, muthukumano wautitooriyu a oxikola. Miyo kaatthuna kilaleerye mwaha wa omwaraxiwa wa Mihasa iyo mithanu na miili sookiserya." Nto siiso hiyo khulikari khalayi

ene, ni naahikhalana ovirikanyiwa vakhani. Awo khanrowa onitthuniherya orumeela-tho ixikola iya, anoobelaxa atthu anci-ene. Khaninrowa owerya okhalana hata nipuro. Vano nto miyo khuupuwela, kiryeene weno nto, ohiya . . .

<sup>12</sup> Hiyo khanikhanle waahelaka atthu othene, hiyo nalalee- . . . Eyo khelaleeriwe, vano. Tivo hiyo naahelaru atthu othene, ophavela waahela mutapernakulu mu, khinaarowa owerya wira. Moone, eyo paahi . . . mahiku mathanu mu yaamukhala yootepa.

<sup>13</sup> Vano, kikilaanthe-ene vale kilavulaka ni Munna Neville ni Munna Wood, n'akina, nihuupuwelela wira yeela. Naahiwerye, ohiya, eyo yaamuniiriha okhalana miteko mithanu s'okokhorela; yaarowa okhala mahiku miloko miili ni mathanu na mararu, miloko miili ni mathanu na maxexe, miloko miraru miloko, miraru nnimosa, ni noopacerya. Ahe, kinoona wira nakhalana, nimpacerya Ettiminku enrwa, ninoowerya okhalana miteko miili s'okokhorela, Ttiminku voosiisu ni Ttiminku ohiyu, eyo ti muloko ni mathanu na mararu. Vano nto mi—miloko miili ni mathanu, okhalana Ttiminku voosiisu ni Ttiminku ohiyu. Iyo miteko mixexe. Vano Akostu nihiku noopacerya, okhalana Ettiminku voosiisu ni Ttiminku ohiyu. Naamukhalana miteko mithanu na mosa, vano nto khonrowa okhala ophunyana wira naakelihe atthu. Ni kinuupuwelela siiso.

<sup>14</sup> Khimunoona wira yaamukhala yooreera ohiya okhalana atthu othene oothukumana ni ophunyana, ni sothene? Nto siiso ni miteko seiyo miili, ninoowerya ovilela, vakhalaru wira atthu othene anookaliherya. Wa ohiyu mithanu, woottharana, yaamukhalaha yoolipa.

<sup>15</sup> Ni kithukumane ni maatiministratoore ni ahumu va, kiryeene weno.

<sup>16</sup> Ela eniireya mapuro othene. Hiyo ninkhala mahiku ala ookiserya, okathi Ehapari yooreera ehiraanaaya e—epacerelo ntoko saatthuneyaya okhalana. Kherina ihaakhi saatthuneyaya okhalanaka. Yothene eluttanne ni poliitika ni itthu, ni eri ntoko eyiiraanelo. Ni ti yeeyo vookiserya emphiheryaya, okhala wira ekanyeryo ya nxeni ehaana orwa ni wiiraana, hiyo noosuwela. Tivo hiyo—hiyo . . . Okhala wira, ekhoottelo, “khaavo mutthu onwerya othuma wala otumiha, ohikhanle wira orina ekanyeryo ya nxeni.”

<sup>17</sup> Nto vano kintthuna kiphavele, ni ahumu. Kinnoona weettiheriwa. Nkinakhalaneke etala siiso mmurimani mwaka wa Muluku, kookhalaru, ntoko sirinaaka vano, moone. Maana . . . Ni miyo—miyo kintthuna kikhalane eheema aka ni i—itthu saka, ntoko yoowoona Apwiya akivanhe aya, ni kookupali wira okathi ori vakhiviru vano. Ni kintthuna koone kiryeene weno, xeni nahaakhanlyahu okhalanaka eheema.

<sup>18</sup> Ni—ni vo naarowaka, ntoko orwa nno oJeffersonville, ohiya okhalana nihiku nimosa wala maili, wala mararu wala maxexe,

ninoowerya okhuma nno ni ovenxa eheema ela, ni okhalana isumana piili wala tthaaru, moone, ni khaavo onwerya ohimya etthu ya yeeyo. Ninoowerya okuxa ekampu ya poola, wala, awo yaahinitthuniherye orumeela yeeyo, ookhala mulimi nno onrowa onitthuniherya orumeela ematta. Ninoorentteri ematta ni—ni nihele mwemmo. Etthu emosa paahi naakhanlyahu wiiraka iwe, waamukhala oteka yawihu—ixooro sahu, ni sikina, ni yaarowa okhala ya ecalelo ahu. Ni eyo vaamuweryaneyaya wiiriwa vookhweya-vo. Nto nuumala ninrowa opacerya okhalana miteko sahu s’okokhorela siiso okhala wira eyo ti yoolikana ni yoowoona y’Apwiya, ni ehaana wiiriwa siiso.

<sup>19</sup> Ni kirwaaka, nsana, ni kiroophwanya, moosuwela, *ela, ele*. Nto kaatthara ephiro, nto mpatthani aka ooreera murima aavira, khwira, “Sayi, Billy.” Miyo khunweha, ni maihi ootteela ntoko nakhutu, erukulu so. Nto mmirav’owo orina munnuwelo aka. Hiyo neettaka hoothe, mmiravo mmosa oophwaneliwa, okathi waaryaaka mwanamwane. Eyo yaanikikhaliha ntoko ootikiniha vakhani.

<sup>20</sup> Mwan’aka mwaamukhaani, Joseph, khwira, “Muxankale-ni, Paapa?”

“Oh,” miyo khwira, “Nkikhanle wooleeliheryakani, Joseph. Moone, nkikhanle, nkikhanle wooleelakani.”

<sup>21</sup> Ni kininweha Elij’ Perry okilaanthe ottuli iwe, ni Muhano Perry; enkhala ntoko nsana awo yaarisaya anaitthoko aili ooriipa maihi iwe, ekhalaka mukhora ontharelana wa miyo, okathi waarinahu mwaatiya wa khalayi, *Wahoo*, ni, omuratthini wu, ni naamesakahu ohiyu. Owoona oowaili aya ni maihi ootteela, moosuwela, ennihimya etthu, ettiwi yaamukhaani enruma, “Nyuwu khamuhalanne okathi munci-ene.” Munnona?

<sup>22</sup> Tivo, kintthuna khula nihiku a ekumi aka nikhale na Yoowo. Enikihaleela, okathi orinaaka, kintthuna kivirihe nipuro khata kiiraka etthu khata, yaahikhale-tho ovikana weemela vanloothoni v’ephiro, kikhalelaka onamoona wa ovuwa ni nttittimiho wa Muluku. Nto miyo—miyo kiri va mwaha wa niwoko nenlo.

<sup>23</sup> Ni kihaana nipuro naamukhaani na siiri osulu nno oGreen’s Mill, Indiana. Kehiyo epooma, vano, mo—mothakonii. Ni athu amosa-amosa aakuxa, ni kanoohiyani nyuwu hata ohela nnawu vale. Masi kihaana muttupha vaavo awo yahaarowaya nnakhala okiphwanya kakela-ru mmo. Kinrowa ohiyu, ni owo khonrowa osuwela kaakelala wala kaakhumaka. Ni khonsuwela vari muttupha, ni khaarowa owerya ophiya-vo hata wira ori yayi. Ni kintthuna kirowe weiwe kalavule n’Apwiya, okathi vakhani, kinnoona wira ennitthunaneya.

<sup>24</sup> Amwaar’aka, awo anthhuna orwa, anthhuna othhika orwa othotola, ni Rebekah ni Sarah, ni awo, ni axipatthani aya. Ni

hiyo nitthikenle nno vano wa isumana tthaaru sinttharelana, ni Apwiya yathhuna vale.

<sup>25</sup> Ni miyo kinoona wira, ohiya ophavela waathukumanya athhu vamosa, wa mithukumano iyo va mutapernakulu . . . Tthiri, ela ti yawihu, ti y'Apwiya, anivanhe. Ni etheku yooreerihiwa. Kaanittthuna nikhhalanne muteko w'okokhorela wa Ttiminku voosiisu, muteko wa Ttiminku ohiyu. Eyo yaamwaatthuniherya athhu otthikela owannyaya, nto elipelele mpakha esumana enrwa.

<sup>26</sup> Nkinoona wira kaamuwerya okuxa ni—ni ohimya moota erinaaya okhala ya omwaraxiwa wa Mihasa iyo sookiserya, okhala wira mwa seiyo wookhala, Mutthaka muulupale saana. Masi kaamuwerya waavekelela aretta, ni wira itthu si . . . Kookhalana Mitthaka, nave, ntoko Apwiya sinkivahaya, wa ekereja. Esumana yothene, kinookhumela nno mothakoni nipuro nlo kasome, kinootthika Ttiminku voosiisu, kikhhalane muteko w'okokhorela wa Ttiminku voosiisu ntoko ola, ni muteko wa Ttiminku ohiyu. Pastore ahu mwaamukhaani ooreera murima, Munna Neville, miyo koomukoha sintoko yaamukhala saana ni yoowo. Eyo ti okuxa miteko sawe sothene, masi owo vootteeliwa murima saana oohiyerya—oohiyerya yeeyo. Miyo paahi . . .

<sup>27</sup> Munna Capps, owo, kinoona wira, ookhalana ettekuxa yo weettasa, nave, ni kinnoona wira owo oorowa, ni—ni Munna Humes. Ni Apwiya yaahikhalana va Munna Mann wira ahalane, opuru owo. Moosuwela, eyo kahi yooreeraxa moota Muluku oniiraawe itthu? Owo kweekwe onkhalana itthu soolokihiwa oratteene. Miyo kihoorwa kimwiiwa mutthu alaleyaka. Miyo khwira, “Eyo kheni . . . Miyo kinnaamini . . .”

<sup>28</sup> Munna Capps, owo aarwiiye oTucson, ni kinoona wira eyo yaahimooopopiha naanaanoru, saari ikharawu soophiyaka miloko mixexe ni tthaaru. Owo khaatthuna osuwela etthu ya yeeyo, tivo owo khurowa, owo ni Munna Humes, khurowa oPhoenix. Veekkehai, ti miloko mixexe ni thanu na mosa, miloko mixexe ni thanu na tthaaru iwe. Eyo yaari nlelo yootepa, siiso kinoona wira owo oronwe oTexas nuumala yeeyo; owo, aphaavelaka ophwanya opuro.

<sup>29</sup> Masi mukihye kooleeleni, muhitthune okhala wArizona okathi ola wa mwaakha. Saari miloko mithanu na mosa, nihiku nlo, namathanu evinre, ikharawu miloko mithanu na mosa, oParker. Ni ti weiwo onkhalaawe-wo, Munna Craig, a okereja va. Ni nyuwo pooti opwexa nooce, ni nnimwaarikeya nihinatthi ophiya vathi. Nyuwo, munoosenya ni—ni enaanelo yoorimeela, eyo paahi . . . Khiyaawo enaanelo nnakhala etthu, ni ttukuttha eeekkehai okathi ola wa mwaakha. Masi okhuma Novempuru, Dezembro ni Janeiro, ti yooreeraxa. Masi waaphiyaka ntoko Marsu ni Aprili, vanreerela mukhume-wo mwaahitthuneke ottiyeya iphumu.

30 Nto siiso khwiiraneya Munna Capps n'akina ophiya okathi ene yoowo, kinuupuwelaaka wira yaahaatutuxa. Vano khino Apwiya yiirale eyo ni niwoko khata. Miyo kinaamini ela, wira Muluku onneettiherya mavallo a anaxariya. Imaara sikina enkhala ntoko yoolipa.

31 Ntoko nihiku nlo mmukwahani mu orowa wAfrika, kaahikupali wira keetta mwa otthuna wa Muluku. Okhala wira, mwaisana, kaari Okuusini, kikhalanaka mithukumano sootharelana, ni, awo—awo, miyo kuupuwela . . .

32 Nto mutthenkeso owo khwaakhula, khwira, “Murweeke, ni Alipa a Nakoso aKristu, masi hiyo khaninrowa okhala nnaata.”

33 Ahe, miyo nkinthuna waakeliha axilopwana awo eriyari ya yeeyo, moosuwela, otannya ekhotto. Miyo—miyo kintthuna wira awo yiisooneke oratteene mmosa ni mukhw'awe. Siiso miyo khwira paahi, “Ahe . . .” Kaalepenle ewarakha, miyo khwira, “Muupuwele, miyo koophavela orwa-tho wAfrika mwa miyaakha, emaara ekina, koonaka wira muteko aka khomanle wAfrika. Nkirina . . .”

34 Xeeni kaakhanle aka orowaka wAfrika, kirine-ene imiya thanu na mosa, imiya thanu na piili oEstadu Unidu, siitthanaka, moone, wenno, kihikumme oCanada, oMexiku, wala khula nimosa wa mapuro awo? Xeeni otthunaka orowa wu? Masi eyo etthu mmurimani mwaka, enikiroiha wAfrika. Iwe, atthu ale, yookhala—yookhala etthu mwa yaawo, enikisivela, ni kintthuna kirowe paahi mwaha w'atthu ooriipa. Ni yookhala etthu mwa anci-ene aya, ahooleli awo, awo khaniisoono wira kaahaana wira yeeyo. Miyo—miyo kintthuna kirowe w'apatthani aka ooriipa. Ti weiwo Apwiya akiitthanne aya. Nto wano awo annitthuna etthu. Anci-ene wa atthu awo, atthu awo ooteela, anoowerya okhalana mameetiku ni sothene. Masi aneene elapo ale oohaawa ankhala iwe, ni oowuntta nuusu. Miyo—miyo—miyo kinoona wira awo t'ale ankhala ntoko wira yaamwaakhela Eyo. Ti yaawo. Yookhala etthu wa yeeyo.

35 Mwaphiyerya-ru nipuro, munkhalanyu a akhili saana munsuwelanyu sothene, vano Muluku khokhanle wiiraka etthu ni nyuwo. Masi mwaphiyererya-ru nipuro munthunaanyu owiriyana ni wiixutta, nto—nto p'ukathi wa Muluku, okhanlyawe okelaka ni olavula ni nyuwo.

36 Siiso nto miyo kaahiwaakhula ni ewarakha, khwaaleela. Nto kiirale, “Muupuwele, Nihiku na Olamuliwa, matata ale a makhuva ekhume omwiixini, yoolamuleni! Ephome aya ekhale mwa nyuwo, kahi mwa miyo, okhala wira miyo kinniphavelaka mwa miyaakha soophiyaka muloko wira kitthike.”

37 Nto okathi oveleelinhe aka ewarakha, wira kootthika, Etthu yaahikiirela, “Mwamoone Sidney Jackson, mwakhalane mukwaha wo oxaya.” Ni, okathi ene yoowo, Apwiya yaahilavula

ni Sidney Jackson, khwira, “Mwatto a nseese na ncano, Munna Branham ookolaka iheema; Durban, muthukumano muulupale.”

<sup>38</sup> Ahe, owo eettaka wenzo, ni owo oolavula va ni nyuwo. P’uhimya wene, hiyo naapatinse...Owo aari voolipa murima avirikanyaka opatiiso ula mwa Nsina na Yesu Kristu. Nto amwaar’awe yaari ootepa onvikana owo, awo yaamukhuma paahi. Nyuwo mwaamuwerya...Mukihiye kooleeleni, nkinatoko owoona athu oowiivaha. Awo aakhalana arumeyi oophiyaka emiya ni miloko mithanu iwe, apatisiwe mwa Nsina na Yesu Kristu, ni awo anoottikinya elapo paahi. Mutthaka onoomwareya paahi wAfrica, mapuro othene, anamatteeke ni axilopwana aalupale anoorwa, ampatisiwa mwa Nsina na Yesu Kristu.

<sup>39</sup> Nto siiso miyo, vakhumme aka orowa iwe, kinimoolelani, kiira kihinatoko okhalana mukattyamiho muulupale kookhalaru, wo ophavela ophiya iwe. Vano nto minuutu wookiserya, minuutu wookiserya wira kikhume, yaahilempwa vaviisani vaka, “Muhuupuwelele khula enamuna ya muteko wa etiini; murweeke pahi oxaya.” Ahe, nto, yaari yoonanara.

<sup>40</sup> Masi miyo khwira, “Nkincala etthu xetwani oniiraawe, miyo—miyo nkinwerya...Nkikhanle waakhulaka ele Munna Jackson ohimye awe ya mwatto a nseese na ncano, ni *ela*, *ele*, wala *ekina*. Miyo—miyo nkikhanle waakhulaka mwaha wa yeeyo. Masi koosuwela wira Muluku ookileela wira ‘kirwe wa Sidney Jackson, ni wira kirowe kaxaye.’” Nto miyo khwira, “Kinoorowa.” Ni imaara sikina...Ni kaarina emosa wa ikwaha sooreeraxa.

<sup>41</sup> Kiphiyerya osuwela ole waari mukatthyamiho. Vano kinuupuwela, ntoko Otupuru, Apwiya yatthuna vale, kinoowerya otthika kakhalane muthukumano ni sothene, ni wiiraana woomalela, sothene sikina, moone, wAfrica vano. Koophiya moowiixeryani wa mwaha ni kisuwela vaari mulattu ene, etthu yiirihale. Akilepelaka, nno, ola aakhalana *ela* y’ohimya, ni etthu ehaana etthu y’ohimya, ni *ola* mukina vale. Etthu yooreerela wira, orowa khusuwela, mmansinyu. Ni koosuwela vatthu vaari mulattu, ni etthu yiirinhe eyo; waari mwaha wa athu anci-ene othukumana emaara emosa, kuveerunu khaakitthuniherya okhalana.

<sup>42</sup> Vano vakhala wira Alipa a Nakoso aKristu wala khula mutthenkeso, anrowa onikeliha, nto kuveerunu mmansawe... okhala wira mutthenkeso onthonyeriwa ni kuveerunu, kuveerunu onveleliha okhapelela wa mamiliisiya. Yaakhanle axilopwana miloko miili n’athanu a muromolelo mmosa, miloko miili ni athanu a mukina, nlelo awo khankupali. Ohaana okhala mu—muru wa mutthenkeso yoola. Ni Alipa a Nakoso aKristu ti mutthenkeso woohikhala wa etiini onthonyerya ikereja sothene. Totori Simoni, t’onihoolela iwe, mulopwana mmosa

ooreera murima saana, kaahiwerya omusuwela n'ulavula ni yoowo. Nto awo t'anrowa okhapelela mithukumano, ni ikereja sothene sikina sinrowa othukumana. Munnona? Ni kookupali wira ninrowa okhalana mmosa wa mithukumano suulupalexa sitonko okhalaniwa wa—wAfrika.

<sup>43</sup> Masi mwaha aka waari ola, mwaasuwelaka wira—wira mumphavela wira ele eri yooreera, etthu yoopacerya t'ila, moonaru weettiheriwa wira etthu, vano nwehe ni Masu ni moone yaakhanle-ene oratteene ni Masu, vano nto muhihiye hat'etthu oweemexani. Nkincala iroota kavi xetwani onrihelelaawe mphironi, nvire vasulu vaya paahi.

<sup>44</sup> Kaahaaleela amwaar'aka ni kaahimuleela Munna Wood, okathi ophin'ye aka nno, ni apatthani amosa-amosa kikumananne aka nsana: kinnikhalana nno miyaakha mithanu vaakirikelaya osuwela etthu yo wira. Ennikhalaka yo—yoowuukhula...Moone, muhakalaliho ene, eriyari ya ikereja, waahikhwa. Atthu othene annisuwela eyo. Nyuwo munnoona mutapernakulu mu. Nyuwo munnoona mapuro othene. Yookhala ntoko erumelo, moonelo wa mookhwaani. Yookhala etthu tu ehikhanle saana. Okhala wira oviheriwa wa muhakalaliho wookhuma mw'atthuni. Munooovolwa mukereja, munooovona awo akilaanthe-ene vale. Nto pastore onimwiikwattula arowelaka mutthaka mmosa n'itthu ekina. Nto naanaanoru, onoorukunxa alavulaka sa niira ninrowa okhalaniwa, wala etthu siiso. Enkhala ntoko erumelo ya mokhwaani mapuro othene.

<sup>45</sup> Billy Graham onnoona eyo; Oral Roberts. Mwenye Allen aahikhalana mukattyamiho, ntoko sinsuwelanyu. Oral Roberts ookhalana ipa iye sa itoolare imilyawu miloko mithanu, ni sikina, iwe. Owo ookhalana exikola. Ni, ahe, hata mutthu vapuwani naanaano va.

<sup>46</sup> Miyo kaahikhuma va, mwaha wa yoowoona, wira kirowe oTucson wu, wira koone etthu Apwiya yaatthunaaya wira kiire. Awo khikumana ni miyo weiwe, siiso Awo yoohimenryayani wa wira yaamwiira, ni mukhalelo wa Malaikha mathanu na maili, ni khwira wira kitthike nto Ikanyeryo Thanu na piili saarowa otaphuliwa. Vekeekhai ti yeeyo yaakhumelenle.

<sup>47</sup> Awo yiirale, nihiku nimosi ni Munna Wood okathi aaronwe awe iwe, hiyo naaronwe nipuro nenlo, kirihela nluku osulu, nlo khukhuruwa, Awo khwira, "Muhina mwa othana omosa n'uhiyu omosa, nyuwo mwa..." Etthu, miyo kinooliyala ale yaari moolumo. "Munoorowa wona ovuwa wa Muluku."

<sup>48</sup> Nto mmeeloni mwaya, eyuupuru khurwa okhuma osulu, nto noosuwela ehantisi ya etthu yaakhumelenle. Okathi ewenlyaya, awo khukoha yaari exeeni iyo. Miyo khwira, "Elavunle moolumo mararu, mwa irumelo tthaaru suulupale." Axilopwana awo yiwale oruma paahi. Miyo koosuwela etthu

Eyo yaahimyyaya. Nto khwira, “Ehukhumu enoomana Olimani Onkela nsuwa!” Mahiku maili nuumala yeeyo, Alaska aahala opwina. Sinkhalaka itari iwe, itetere s’elapo, sothene. Nkaawezeni paahi, khula nihiku, itetere s’elapo sittikinyaka mapuro othene.

<sup>49</sup> Muthukumano aka wookiserya, muthukumano wookiserya kaarinaaka, ola onrowa okhala Mutthaka aka woopacerya, tthiri, kinlaleyaaka okhuma okathi yoowo. Miyo kaamulaleya oLos Angeles, wAwutitooriyu Biltmore, ni kaalavula mwaha wa mulopwana onimuthanla mwaara. Alakela nyuwo muhaakhela efiita aya. “Ti,” miyo khwira, “Eyo enooniherya mukhalelo wa murim’awe ni ithama sawe.” Wira, okathi mulopwana ommukuxaawe muthiyana, ommukuxaawe mwali, wira akhale mwaar’awe; owo amukuxa, moosuwela, mwali mmosa a vano okhanle Ricketta pure, eyo—eyo enooniherya paahi ele owo okhanlyawe...Owo amuthela pwiyamwene ooreera wala pwiyamwene a ekhapa, enakhaleru exeeni, eyo enooniherya yawawe, ele vekeekhai ekhanle mwa mulopwana. Masi muKristu, owo omphavela mukhalelo wa murima mwa muthiyana, okhala wira owo ontthokiha etthoko y’ohoolo ni muthiyan’owo. Owo ontthokiha, onimphwanya mmosa onrowa opaka etthoko. Ni miyo kiirale, “Vano, Kristu, voolikana ni Masu Awe va, onnihimeerya ele enrowa okhala Etthoko ahu y’ohoolo. Muthinto xeeni wa muthiyana Owo onrowaawe omuthanla nto, namuttompe a muromolelo? Nnakhala! Owo onrowa omuthanla muthiyana orina mukhalelo wa murima ni Masu Awe, nto owo onrowa okhala Mwaakameliwa.”

<sup>50</sup> Nto kiryeene weiwe, Etthu emosa khukivara, ni nkaasuwenle etthu mwa minuutu miloko miraru. Yaahikhala elaleeryo y’eprofeta yaakhumme. Yoopacerya kinuupuwelaaka, Munna Mosley ni Billy, miyo kaari mphironi, keettaka. Nto Eyo khwira, “Nyuwo Kafarnawu, muniisiitthana ni nsina na Malaikha,” owo ti Los Angeles, muttethe wa malaikha, moone, malaikha, “mwiisinnuwinhe mpakha wirimu, munooyevihiwa mpakha omooroni. Okhala wira, miteko sulupale saavariwe-ru oSotoma, sivariwe mwa nyuwo, waamwiira okhanle mpakha olelo.” Nto eyo yaari yothene voohisuwela, wa miyo. Munnona?

<sup>51</sup> Ni moota kimalihaka-ru oleeliheryana, Kristu, kimuttottopelaka Yoowo ni kihimeeryaka ekereja. Miyo khwira, “Nyuwo athiyana, kivancala moota kimpavelaaka orwa wa nyuwo, wala olaleya kipwapwelaka itthu iya; ni nyuwo alopwana, nyuwo alaleyi; oowootoithiwa voohihyererya okathi wothene, muniira vamosaru. Nyuwo munoonyakela Eyo ntoko wira Masu a Muluku kahi etthu.”

<sup>52</sup> Nto vaiwalyaaka yeeyo, miyo khurwa, khwira, “Yookhala Yolempwa emosa ya yeeyo nipuro nlo.” Nto kirowa khuphwanya wira aari Yesu, ampwapwelaka Kafarnawu mukerekhere wa ephareya. Ohiyu yoowo kaahiphavela

Soolepwa. Kirwa owaani, kikuxa eliivuru ya sookhumelela; nto Sotoma ni Komora saahinto okhala e—epooma yooruwerya, nipuro nuulupale na olumwenku wa Amalapo. Ni moosuwela, epooma eyo, yaahisama Mphareya Yookhwa, mwaha wa etetere ya elapo. Ni Yesu aaheemela, khwira, “Kafarnawu, vaakhanle wira oSotoma saahivariwa miteko sivariwe mwa nyuwo, yaamwiira ekhanle olelo. Masi vano nyuwo muhaana oroihiwa mpakha omooroni!” Nto miyaakha soophiyaka imiya piili wala tthaaru nuuvira oprofeta Awe, ipooma iyo sothene sa olimani, khula emosa yookhala omuhiya Kafarnawu, ni emphwanyaneya vathi va ephareya. Etetere y’elapo eroosamiha mphareya.

<sup>53</sup> Vano nto khulaleerya oprofeta, “Los Angeles onoorowa okhala vathi v’ephareya.” Nto miyo khurwa owaani, kirowa wAfrika. Nto kiryeene wAfrika, awo khukhalana etetere y’elapo. Ni anasiyensiya . . . Nyuwo muhona eyo, eyo yaari muhparini, wira mampa maalupale ooreerela, yaahikomowa, oLos Angeles, ni moteeli mmosa, ni sikina. Nto vano yookhala e . . .

<sup>54</sup> Okhuma okathi yiireiye-aya etetere ele, yookhala ephaka ya isentiimeturu thanu wala thanu na piili ethukunwe vatthayani, opacerya wAlaska, ovira Isisiro sa Aleuta, enkhuma voophiyaka imiilya emiya ni miloko mithanu wala imiya piili mphareya, entthikela okhuma oSan Diego; envira oCalifornia, wala Los Angeles, ni enookhuma-tho vakhani ohitto wa epantte onkela epheyo wa oCalifornia, nipuro nikhaani nniitthaniwa San Jose, ohitto vakhani.

<sup>55</sup> Ni nasiyensiya ola aamulavula, akohakohiwaka. Hiyo naamoono mutelevisawuni. Nto owo khwira, “Vathi va yeeyo yookhala elaava enkaphula.” Ni owo khuhimya ela, khwira, “Wira nipattuuxa nimosa ninoorowa okomowa,” ni khwira, “ni enrowa okhala siiso.” Nto ela eri- . . .

<sup>56</sup> Mulopwan’owo, nasiyensiya aamukohakoha nasiyensiya ola mukhulupale, khumwiirela, khwira, “Ahe, nto yothene eyo yaamuweryaneya osama?”

Owo khwira, “Yaamuweryaneya? Enimwiiraneya!”

Khwira, “Ahe, vekeekhai, alakela sinrowa okhala iyaakha, sinci-ene okhuma vano.”

Owo khwira, “Vanooweryaneya okhala muhina mwa minuutu mithanu okhuma vano, ahiiso vanooweryaneya okhala miyaakha mithanu okhuma vano.” Owo aavahale miyaakha mithanu paahi.

<sup>57</sup> Masi vekeekhaixa ntoko keemenlyaka vale vathi va Muupuxeryo owo, waahilamulela ehukhumu Olimani Onkela nsuwa iwe, vano nto khuttharela naanaanoru mpakha osulu nno ni opwina wa Los Angeles, owo oomalamala! Ti yeeyo. Enimwiiraneya. Liini? Miyo nkisuwenle.

58 Masi, oh, exeni yiiraneneiye? Nyuwo moosuwela, vano nirina ikontinente thanu na mosa. Naarina thanu na piili, ni ele esamme eriyari ya wAfrika ni Estadu Unidu. Oh, ti ya ehantisi, moosuwela ya yeeyo. Vano, eyo yasama vale, nto kintthuna wira nwehe okathi. . .

59 Ola waari mutthaka kaalaleiye aka okathi, kookupali wira Munna Elij' Perry khino aari tiyaakono vaava mukereja okathi owo, mpakha vansuwelaaka. Masi ehimnye wira, "Okathi onimoorwa. . ." Miyo nkaasuwela mpakha Muhano Simpson okiruhela mu—mutthaka nihiku nlo. Ni kookhalana yoolempwa mulivuruni yaamukhaani, wira, "Mothakoni. . ." wira, "Ephareya enoottthukula ephiro aya okela mothakoni." Eyo yaari miyaakha miloko miraru sivinre.

60 Ni, tthiri, Ephareya Salton eri ntoko imeeturu miloko mithanu na miili vathi vathi va eyaataleleyo ya ephareya, ni vakhala wira eyo yuulupalexa enimweetta, etthaya ele emiryaka eyo siiso, ni imiilya imiya sene kwatratu, imiilya imiya ni imiya kwatratu sipwinaka mutthayani, eyo enooriha niwipi nuuluapale na mphareya mpakha wArizona. Tthiri, yaamwiira.

61 Oh, hiyo nri okathi wa wookiseryani, ewoora yoovuwa, orwa wa Pwiya Yesu! Owo ohimnye wira, "Sinookhala itetere s'elapo mapuro manci-ene, ovela-vela wa okathi, oriipiwa murima variyari va ilapo, mirima s'atthu sinoovolola mwaha wo woova." Iirale wira, "Itthu iya sapacerya-ru okhumelela, nvenxe muru, ovuluxiwa wanyu ori vakhiviru." Oh, wulu!

Maloko anoophweeyasa, Isarayeli onooventya,  
Ithoonyeryo maprofeta yaahimnyaya;  
Mahiku a Amalapo t'owaalakeya, oosareya  
woova;  
"Mutthikele, yawinyu, O oomwaramwareya."  
(Muhivonye wira yeeyo!)

Nihiku nlo noovuluxiwa nri vakhiviru,  
Mirima s'atthu sinoovonya mwaha wo woova;  
Musarihiwe ni Erooho ya Muluku, mukhalane  
mithuko sanyu soolokihiwa ni sooreera,  
Nwehe osulu! Ovuluxiwa wanyu ori vakhiviru.  
(Eyo ekeekhaii.)

Maprofeta oowootha animootha, Ekeekhai ya  
Muluku anookhootta,  
Wira Yesu Kristu ti Muluku ahu;

62 Muhoona elatarato nihiku nle, moota Owo aarukunxenle awe elatarato mpararini vale? Ni elatarato ene ya Malaikha awo mathanu na maili avenxiwaka, murukunxele epantte ya moonoo woolopwana, nto vo eri ethoni ya Pwiya Yesu ewehaka-tho elapo ya vathi.

63 Munnuupuwela okathi waalalenryaka *Wakathi Mithanu na Miili sa Ekereja*, kahaaweryaaka osuwela mwaha wa xeeni

Yesu eemenlyawe vale ni “yootteela” eyo vamuru Vawe. Owo aari Mmiravo. Miyo kiphavela mBibiliani, ehimnye wira, “Owo aamurweenle Humu muulupale, Yoowo maihi Awe yaari aya ootteela ntoko mairi.” Yesu aarina miyaakha miloko miraru ni miraru ni nuusu paahi, okhomeliwa Wawe vamwiikimanyo.

<sup>64</sup> Miyo kaahimwiitthana Munna Jack Moore, teyooloku. Owo khwira, “Oh, Munna Branham, ole ti Yesu mwa mukhalelo Awe woovuwihwiwa.” Khwira, “Nuumala okhwa Wawe, ovithiwa, ni ohihimuwa, Owo aahirukunuwa khukhala yeeyo.” Eyo yiiweya oratta-ene wa teyooloku, masi khiyaalikanne saana, khiyaaphiyenrye etthu ene.

<sup>65</sup> Miyo kirowa iwe kipacerya okathi ule woopacerya wa ekereja, vo Erooho Yoowaarya khupulula. Vano mookhalana mwa *Wakathi* sanyu sa *Ekereja*. Kinoona wira iliivuru sinookhuma naanaano va, ni ihimeryo sothene sa yeeyo. Ni yoonihenrye wira Yesu aari Mphuki. Yookhala eperuuka yootteela awo yaawarakaaya, yaawaraka eperuuka ni yaawara ntoko mphuki, oInklatera nlelo enniiriwa mwakhalana-ru okhulupale woomalela. Ni orukunxela elatarato ela epantte ekina, Owo ori vale, maihi Awe ooriipa, munoowerya woona epantte ya ireru Sawe, ni owanre eperuuka yootteela. Owo ti okhulupale wookiserya, Owo ti Mukhulupale Oomalela. Hata Muluku ohimnye siiso, Mwaneene, “Ola Mwan’Aka onimphentexaaka, mmwiiweleleke Yoowo.”

<sup>66</sup> Owo ori valeo ni Malaikha awo, Mutthaka, waari otaphuliwa wa ikanyeryo thanu na piili iyo suupulunle *epyo y’enowa* ni itthu iya sothene va. Ni eyo enooniherya wira ti ekhuneelo Awe, ti—ti Okhulupale Awe Woomalela. Owo ti Muulupale, ni Owo owanre eperuuka, ahiiso o—oowiikhuneela. Bibilia ohimnye wira Owo aarukunxale ethoni Awe, ahiiso Owo aarimwiirukunxa Mmansawe, *en morphe*. Nuulumo nlo ninkhuma mwa nuulumo n’Ekereku, *en morphe*, nenlo nnihimya namapaka muKreku onvara ipantte sinci-ene; olelo owo etthu emosa, mwa yoowiira enttharelana owo etthu ekina. Owo aari Muluku, Tithi, mwa yoowiira emosa; Muluku, Mwaana, yoowiira ekina; vano nto Muluku, Erooho Yoowaarya, mwa yoowiira ela. Munnona? Owo ori vo, Masu Awe nlelo ti Maalupalex. Hiyo ninkhala mahiku ookiserya.

<sup>67</sup> Kitthikaka okhuma wAfrika nihiku nlo, kaahikhulumuwa. Moone, ti, wu ohiyu vano, ni muhaana wiilikanyiherya. Ni okathi kiilikanyihenrye aka, naahitthika. Naahikhalana mukwaha wooreeraxa, mukwaha wo oxaya, mmosa wa sooreeraxa kitonko aka okhalana kookhalaru. Vano Billy ookhalana ilatarato kamosa-kamosa, khino onookhalana okathi okhanlyawe woonihaka nipuro nlo, ni owoonihani mukwaha.

<sup>68</sup> Kaahikhalana yooloha. Mwa enamununa khata, kweekwe kinnilohaka kitthikenle Ekupaniya ele ya Miteko

s'Anamunceene, mwa enamuna khata. Siiso miyo—miyo kuupuwela wira kaanvololiha muteko, kaahaana...Awo yaanikihiya ootaphuwa, ni kuupuwela wira...Ohiya okhuma keettelelaka eliinya ahiiso ni oliviha ikontha, wala etthu kaarinaaka wira, miyo kiirale paahi, "Ahe, miyo ka mukhulupale aka yoomi," Kirowa paahi kirapelelaka. Nto kiphya iwe kirula sawaka...ikuwo iya, nto kiwara ikuwo soorapelela-no. Kaari meekhaaka. Nto kuupuwela, "Eyi, ela kehiyo yooreera, ekupaniya...Ola othana, ekupaniya ennikiliva mwaha w'okathi yoola." Kuupuwela, "Ti yootikiniha." Vano nto kuupuwela, "Ahe, musurukhu kaalivinhe aka mphironi..." Miyo kaarotakaiha musurukhu wo weettelela ni wooliviha mphironi, nto miyo khwira, "Ahe, musurukhu kilivinhe aka, ehiireya etthu, kithweelaka va; Sookirimeela ittikitti saka sothene, ni kookhalana musurukhu aya ni musurukhu aka wootakanxeya. Vano kinrowa osuwela sayi ole olinve ekontha?" Miyo khuupuwela, "Okhala wira nkaaxikha hata vakhani!" Miyo khuupuwela, "Eyo kahi yooreera. Eri etthu emosa paahi ya miyo wira, ekhanle, otthikela wa mukhulupale aka ni omuleela." Owo aari Don Willis, miyo khwira, "Don, sookirimeela ittikitti iye. Vano va ori musurukhu wothene kirinaaka, ni va ori musurukhu wa seiyo, vamosa. Muhiye va ni kaxero. Nto atthu, yarwa, awo anookhalana ettikitti wira kihaakhela ekontha aya."

<sup>69</sup> Alakela aakhala atthu akilaanthe vaava va miyo—miyo... miyo koosuwela wira aakhala. Yaawo kaalivihakaaka ma—mahiku yaawo, ni ka...ni kaaniwunnya ettikitti. Moosuwela, saakhala ipursento muloko paahi mwahiyaru ekontha anyu ovira ehuhu. Nto khino, etoolare emosa ni nuusu, okhala isentavo muloko ni thanu sikina. Anci-ene w'atthu awo yaakhala...Hiyo waaninisivela paahi othukumana n'ulavula, nto yaamuhiya ekontha aya ovira ehuhu, ni miyo kaanirwa olavula ni yaawo okathi vakhani. Yaakinnya isentaavo muloko ni thanu, moosuwela, wira kikilaathi paahi ni olavula okathi vakhani, ni waaliviha ekontha aya. Vano etthu khukhala yoohireera, khukhala ikontha sinci-ene kahaaweryaaka oliviha.

<sup>70</sup> Ahe, miyo koono wira eyo ti yaari enamuna emosa kaakhanle aka wiiraka. Nto kivenya.

<sup>71</sup> Empa enkhalaaahu, Munna Larson muthiyana, nkikupanli wira ori vaava, owo khonreereke onireerela murima; ni owo khommusivela miyo ohimya yeeyo. Masi awo muhano mmosa ooreera murima saana, ni hiyo ninkhala mpa mwawe. Owo ohaana mampa maili, mampa maili makhani vamosa, hiyo nirenttenri oomaili. Nto amwaar'aka ni miyo ninrupa va e—empa ekina kiniwaakhela atthu kawerya vale, ni sookhala moolili miili soolikana mme.

<sup>72</sup> Miyo khuvenya, awo yiira ehinavenye, nto nuuvira okathi vakhani, awo khuvenya, nto khiwuuvela ntata, nto awo

khukiweha khwaaphila imaara soowaatta, miyo khwira, “Moorupa saana?”

Awo khwira, “Nnari.”

Nto miyo khwira, “Kilonhe etthu yoowoopiha. Kaahitthikela Ekupaniya ela ya Miteko sa Anamunceene.” Miyo khwira, “Kiirale exeeni?”

<sup>73</sup> Kinnuupuwela, kiryeene mwanamwane, ahiiso mwammiravo, kaaneettaka iliinya iyo sothene oSalem, Indiana, voovirikana. . . Kaamukela othuma yo—yolya ya voosiisu, khino muhasa wa aveeya. Vansuwani vale vooviha ni sothene, ni waanikikhaliha muretta, olya voosiisu. Kaamunnya isentaavo muloko, musurukhu aka woohala. Mulipa-oowehaxaxa khurwa khwira, khwira, “Moosuwela etthu ehimmwe va—vamuthukumanoni? ‘Mulolo taani owo oninnya isentavo muloko, sa yolya ya voosiisu?’” Khwira, “Mwaahaana ovaha isentavo miloko mithanu mano.” Vano, othene anyu moosuwela wira, isentavo miloko mithanu waari olya wa voosiisu wuulupale mahiku ale.

Nto miyo khwira, “Ahe, miyo nkinlya vanci-ene siiso.”

Owo khwira, “Ahe, akina anvaha isentavo miloko mithanu. Nyuwo muhaana ovaha isentavo miloko mithanu.”

Miyo khwira, “Ahe, miyo nkinrumeela.”

Khwira, “Nvaheke, nnakhala vo.” Owo aari mukhulupale aka.

<sup>74</sup> Ahe, miyo khuupuwela, “Ahe, kiireke exeeni? Kihaana oliviha isentavo miloko mithanu, nto miyo kinlya isentavo muloko.” Vano miyo kaamurowa mphironi waakuxa anamwane yahaarina hata yolya ya voosiisu, ni waavaha isentavo miloko mixexe sa yolya ya voosiisu.

Vano nto khuupuwela, “Ahe, exeeni yaakhanle. . . Khino ti yeeyo Owo orinaawe ya nthowa ni miyo.”

<sup>75</sup> Ni kinnuupuwela, nno woohikhala khalayi, awo yaaroovira yeettelelaka, khuphwanyulasa ekintaali ele iwe, khwira, “Muninnye ekontha anyu.” Moosuwela wira awo ahaanasa ihakhi so weettelela, masi ahaana oliva mwaha wo ohonona.

<sup>76</sup> Miyo khuwaakhula khwira, “Nkinoolokihani etthu.” Miyo khuupuwela, “Eyo enooliva isentavo iyo miloko mixexe. Khino koohonona itoolare miloko miili wala miloko miraru okathi ene yoowo, kaavahaka anamwane. Khino eyo enoomaliha mwaha.” Kitthikela kilohaka.

<sup>77</sup> Ni kaahikhalana mwiri muulupale iwe, anamwane yaathweelaka mukhitte mwaya, nto weettelela. . . Vano awo aneettelela ni elikopeturu. Nto siiso owo khuvolowa khwira, “Billy, ankhi nuuhale mwiri ule?”

78 Miyo khwira, “Nnari, muhuuhe. Ninrowa ovakulela.” Miyo khwira, “Munna Wood ni miyo ninrowa ovakulela.”

Khwira, “Ahe, kinimwaaruma axilopwana erwe evakulele.”

Miyo khwira, “Vano, muhuuhe.”

Owo khwira, “Nkinrowa wuuha.”

79 Miyo khweetta mukwaha. Vatthinke aka, waahuhiwa okhuma vathi. Nto kaamuwerya okaxaari, moone. Miyo khwira, “Ahe, Pwiya, ela enoolakiherya eyo, koosuwela.” Nto miyo khuliyala eyo, sothene saari saana, khuhiya paahi. Ahe, nlelo khuloha.

80 Vavennyee aka voosiisu uwo, kiirale, “Ahe...” Ethhu yoopacerya eniiraahu voosiisu naavenyaka, ovekela vamosa, nto ninoovekela naarowaka orupa ohiyu. Vano nto varonwe aya otthokiha yolya ya voosiisu y’anamwane, kipacerya ovekela. Miyo khwira, “Pwiya, siiso kiryeene mutthu ootakhala. Kiirale-ni mwa makhalelo kihi—kihinweryaaka ohiya Ekupaniya ya Miteko s’Anamunceene?”

81 Kivolowa kirapa, kikhuma. Nto ethhu emosa yaakhala ntoko ookileela wira, “Khino miyo kinoovololiha muteko *Awe*.” Miyo kuupuwela, “Soovira miyaakha soophiyaka mithanu nkiirale ethhu, kimulipelelaka Yoowo paahi.”

82 Keemenle-ene iwe nihiku nlo. Awo aanitekela empa esya osulu iwe, nto Munna Mosley khurwa, aalavula yeeyo. Miyo khwira, “Eyo yoovaha yaamukhaani paahi y’Atithi aka.” Nto owo khupacerya wunla. Miyo khwira, “Moone, Owo iirale, ‘Nyuwo mwahiya itthoko sanyu, mampa, mittetthe, axitiithi, aximai, Miyo kinimoovahani mampa, mittetthe, axitiithi, aximai, ni vaara emiya mw’ekumi ila, ni Ekumi Ehinimala enoorwa.” Miyo khwira, “Moone, kaahaana ohiya etapernakulu kihinreere aka ophenta. Owannyaka Apwiya akivanhe-aya iwe, kaahaana ohiya. Awo akivanhe ela vooPATILI.” Miyo khwira, “Owo t’othamaleya, moone.” [Nipuro vahiitthu mufiitani—Mol.] Nto owo khupacerya wunla.

83 Ahe, miyo—miyo khwira, “Kaahaana orwa nno ni wiivalaaniha, orwa mothakoni mu.” Nto kuupuwela, “Kinniikoha mwaha wa xeeni Muluku aarowaawe okiruuhaa mothakoni, nno weiwo ohikhanle-wo ethhu woohikhala anamareere ni anakhwiitti a veneno a Gila?”

84 Kahi othakoni paahi, ti wooviha, masi ethako ya muroohoni. Oh, wulu! Khiyaavo ekumi ya muroohoni nnakhala, mmakerejani, awo t’ovirikanya. . . Vano, khanatoko woona eyo aakhalaru! Hiyo khanrina hata ekereja yo orowa-wo, wala hat’ethhu. Vano nto okathi. . . Atthu anihalela opweteya, mwa erooho. Miyo kinniweha eyo mw’atthu anthaamela weiwo, kinnoona ivirikanelo mwa yaawo, kiwehaka eyo.

<sup>85</sup> Nto siiso mukhale vathi va Erooho ya Muluku, nto makhalelo anyu anookhala oosivela, ooreera murima, ntoko maasi ankumiherya malaxi ala ni ithutu soowoolowaseya. Vakhala...malaxi ala, wArizona, yahaannunwe; miri iya saamukhala ekosa, mataakhuru ala yaamukhunya ekhale miiwa. T'eniireyaaya yakhala-ru eyuumu mukereja, atthu othene anoohomana mmosa ni mukhwaawe, moosuwela. Ni, moone, muhaana okhalana maasi oowiithyaaleya a epula aniwoolowihani, ni opaka mataakhuru ni muuttutthi wa nawetta onvira.

<sup>86</sup> Nto siiso Etthu emosa khukiirela, “Khino nyuwo munoovololiha muteko wa Muluku.” Vano, miyo khuvekela yoowoona.

<sup>87</sup> Nto Meda aammala-ru okivaha Bibilia musya; ni Munna—Munna Brown, a Ohio, aahikithumela Bibilia musya; oowaili aya okathi mmosaru, wa Natale. Miyo khurwa khumukuxa mmosa wa aBibilia asya. Miyo khwira, “Pwiya, mahiku avinre, Nyuwo mwaahikhalana Urimi Tumimi.”

<sup>88</sup> Vano nwiriyane, kitthuniheriwe kihimye ela. Vekeekhai, awo kahiyo...ela, khonkaravariwa muthukuman'ola, mwaha kinvekelaaka...kinihimeryaaka yeela. Kitthuniheriwe kihimye, muhiire ela. Kehiyo etthu yooreera.

<sup>89</sup> Masi miyo khwira, “Pwiya, yaanikhalaka wira, namaloha aloha-ru yooloha, awo yaamuroiha mpakha wa Urimi Tumimi, ni othariha. Nto vakhala wira—vakhala wira Urimi Tumimi aamwaakhula aphanimaka, Waarya wa erimu, yooloha yaari ekeekhai.” Miyo khwira, “Masi onamukuttho ole ni Urimi Tumimi ule sookhwelihiwa. Bibilia anyu t'okhanle Urimi Tumimi vano; Pwiya, kihikhalakhale kiiraka-tho yeela. Masi kihoovekelani ni koovekela wa Nyuwo, wira mukivahe yoowoona, mukileele mwaha wa xeeni kinlohaaka sooloha iya. Ni kiirale-ni? Kaahononne-ene etthu, kaamwiirenle-ene etthu mutthu mulaponi, mukisuwelihe. Miyo ki—miyo ki—miyo kinoorowa kalokihe. Kaalokihiwaka Ekupaniya ya Miteko s'Anamunceene, kaawiirenle-ene etthu yoonanara wala mutthu mukina, kaawiirenleenini yoonanara Nyuwo, mukisuwelihe. Miyo—miyo kintthuna kilokiherye.”

<sup>90</sup> Nilokiherye, naanaano va. Muhilipelele mpakha okathi vakhani, pooti okhala vaxiye-ene. Nrowe niire naanaano va.

<sup>91</sup> Nto miyo khwira, “Vekeekhai, enookhala etthu muhina mwa Masu a Muluku ala, okhuma Maphattuvelo mpakha Wiisuupulula, ya mutthu mmo Nyuwo mwiirale-anyu etthu ni yoowo, aari ni mukhaleleo mmosaru wa wiikoha waka. Akhala mutthu iirale etthu, nto—nto Nyuwo mmuttharuxa yeeyo, vano mukitthuniherye kikhunle nipuro nenlo mBibiliani. Akhala mutthu, enakhale-ru exeeni iiralyawe, yiireye yeeyo mwa miyo. Vairale aka yoovonyeya, wala etthu Nyuwo muntthunaanyu wira

kiire, wala kihirale aka, mukitthuniherye kimoone mutthu siiso mBibiliani.”

<sup>92</sup> Vano miyo kiphunya maitho, kimuhiya Bibilia okhunuwa, kihela ekatha aka mwa Yoolepwa, Maphattuwelo 24:7. Eliyeseri, murumeyi ooromeleya a Abrahamu, murumeyi a nttharihelo wa mBibiliani, arummwaka omphavela mwaakameliwa a Isakhi. Kaahoono ottetemela. Tthiri, eyo yawaka . . . eyo enoolikana ni Mutthaka aka mukina, omukumiha Mwaakameliwa.

<sup>93</sup> Owo iirale, “Mulaphe wira khamunrowa omukuxa mwaakameliwa mwa yaala, masi murowe w’atthu aka.”

Owo khwira, “Ankhi muthiyana aahitthune orwa ni miyo?”

<sup>94</sup> Khwira, “Vano munookhala ootaphuwa wa elaphelo ela.” Owo khwira, “Ni Muluku a Wirimu onooruma Nlaikha Nawe ohoolo wanyu, wira noohooleleni.” Owo khukhuma naanaanoru khupacerya ovekela, nto owo khukumana ni Repeka ooreera yoowo aakhanle mwaakameliwa a Isakhi.

<sup>95</sup> Mutthaka wooloka voomalela, otthikela mwa Masu, “Rowani mmurowele Mwaakameliwa owo!” Owo muteko. Ti yeeyo ekhalenle aka va. Ti yeeyo kimpavelaaka wira, omwiithana Mwaakameliwa.

<sup>96</sup> Munnuupuwela oCalifornia iwe, okohakohiwa iwe mwaha wa Mwaakameliwa, wooniheriwa, kaarinaaka va. Moota Mwaakameliwa owo aarwiiye awe voopacerya, ni kimoona Owo aviraka. Vano va khurwa Muhano Amerika, Muhano Asiya, ni othene, oh, etthu yootepexa onanara! Vano nto Mwaakameliwa mmosaru yoowo khuvira-tho. Mmosa aya khukhumela ota wa nivalo, nto miyo kaamuhokoloxerya Owo munivaloni; yaari aili, a yaawo. Ni ti yeeyo erinaaka wira, omukhaliha Mwaakameliwa owo munivaloni, omurowela mulopwan’owo.

<sup>97</sup> Miyo khwira, “Muluku, kintthikela owaani, kamuuluule-tho natiri aka, kipacerye vasya.” Tivo ti yeeyo entthokihaahu wira niire, ti yeeyo kikhalelenle aka va.

<sup>98</sup> Kinoona wira yaamukhala etthu yooreera niirale-ru yeela, opacerya muloko ni mathanu na mararu, esumana enrwa, Ettiminku enrwa voosiisu, Ettiminku enrwa ohiyu; Ettiminku yootharelana, ni Ettiminku yootharelana. Akavi anuupuwela wira eyo enookhala etthu yooreera? [Muthukumano oniira, “Amen.”—Mol.] Kooxukhuru.

<sup>99</sup> Vano kintthuna mukiirele etthu. Vakhala wira moomuleela mutthu wira ono—onoorowa okhala muthukumano mahiku yeettaka miloko miili ni mathanu na mararu, mwaamuwerya waaleela-tho wira khaniwenrye wira. Mwaaleele, mwaalepele ewarakha, wala etthu ekina. Kaninthuna atthu orwa ekhala oothepiwa, masi khaniwenrye omphwanya awutitooriyu.

<sup>100</sup> Moone, khaniwenrye omphwanya. Nto siiso okhala wira muthukumano wookiserya kinoona wira khinaarerane iwe, ni sothene, awo paahi... Nyuwo munnisuwela moota atthu aryaaya, ni awo... Ahe, hiyo ninkhala mahiku ookiserya, ti yeeyo tu. Ni anihimya wira atthu yaarimoorwa enahaaxa exikola, ni wira jaarwiiye oxaka-ene, ni wira jaarimwiira *ela*, wala *ele*, wala etthu ekina, ni nipuro nlo khinaareere osareiwa, ni wira mukhulupale a anamattipiha mooro oniira *ela* ni *ele*. Ni, ahe, moosuwela.

<sup>101</sup> Tivo ninootthokiha-tho Mihasa iyo ni malope awo, kintthuna kihele-mo. Kaahoolalani wira kaamwiira. Anrwa vathi va etthu ekina. Ni Mihasa sinrwa siiso, oruma wa malope; masi nintthuna nisomasome yothene voomalela, ni oruuha, otthukaniha yothene.

<sup>102</sup> Akavi asomme etthu ya Munna Vayle, onlepa yeeyo emaara ekina, ni onkilokiheryela ni olokiha malavulelo? Moosoma etthu ya yeeyo? Moosoma, aili wala araru a nyuwo. Kookupali wira nvanre muteko w'eekeekhai, Munna Vayle, muteko w'eekeekhai! Nyuwo, kinoona wira Munna Vayle muthiyana t'ovanre; nto nyuwo muroolepa paahi. Owo—owo aari e... Moone, kahi kweekwe kinaapwapwelaaka athiyana, kinniira, Munna Vayle muthiyana?

<sup>103</sup> Tivo vano nrowe, mwa minuutu, muloko ni mithanu, miloko miili sinttharelana nisome Yoolempwa emosa va.

<sup>104</sup> Ni kookhalana eliivuru ekhaani va. Koomuleela, kookupali, wira aari a Munna Vayle, wala, aari pani, wala kookupali wira aari Roy Borders. Munna Vayle t'okithumenle eliivuru. Kintthuna kipake eliivuru yaamukhaani ya yoosoma.

<sup>105</sup> Masi akhala mutthu otonko oweha ele miyo eniitthanaaka soolepa! Ntoko katthuna olaleya sa Ettheneeri y'Oxaka, kinookweretha ettheneeri. Ni kaatthunaka olaleya etthu ya... Miyo kimpaka sothene va mwa ethoonyeryo, ikweretho, khaavo aawerya osuwela yaari exeeni. Kakhala ota, ni kinuupuwela etthu, kihaana opaka, keettaka mphironi, imaara sikina ekaaro etuphatuphaka, nto kinoolepa *ela*, n'uhimya *ela* ni *ele*, n'upaka ikanyeryo sikhaani, ni mwiikimanyo ni mithato, ni—ni inamuna sothene sa ithu. Ntoko kaatthunaka olaleya sa okhuruwa wa Ettheneeri; nto kinoohela epiraamite, kinookweretha va kihele ettheneeri ya ithoka thanu ya David ekhuruwelaka yeeyo. Ni koosuwela onrowaaka mwa Soolempwa siiso; ni Moise, etthu khata owo iralayawe. Kinookweretha etthu paahi ntoko, maravulo a mpiiru.

<sup>106</sup> Kihaana sinci-ene va. Ni kaahuupuwela, voosiis'ula, kiryeene iwe okathi kuupuwenlyaka etthu kaarowaaka olavula sa mwaha yoola minuutu vakhani va, va yoolepa emosa, wira khino yaamukikuxa minuutu miloko miili.

<sup>107</sup> Vano nto nkinrowa okuxa muteko wa Munna Neville olelo ohiyu. Miyo—miyo—miyo kinorowa omumula olelo ohiyu, kimwiwe yoowo.

<sup>108</sup> Vano nto, Apwiya yatthuna vale, Ettiminku enrwa voosiisu ninrowa opacerya muteko wo okokhorela. Ni nyuwo othene mukikhaliherye, ni ninoovekela, okhala wira yaari mmurimani mwaka ophavela... Awo yiirale, “Ahe, naamuwerya orowa oLouisville wala naamuwerya orowa oNew Albany.” Masi muthukumano waari wira okhale wa oJeffersonville. Kinoorowa oLouisville ni New Albany, imaara sikina, masi ola ohaana okhala weno oJeffersonville.

<sup>109</sup> Vano nrowe nuurame muru minuutu mmosa paahi niryene... Kinlavula ni nyuwo va minuutu soophiyaka miloko miraru. Nrowe nilavule ni Yoowo okathi vakhani.

<sup>110</sup> Pwiya Yesu, hiyo n’a—hiyo veekhai n’atthu ooreerihwa, ovikana snupuwelahu, ovikana sinuwelahu. Tthiri, aakhanle oosuwanyeyaxa eriyari ahu, ntoko atthu a elapo ekina, wala namuhupi a enamuna khata, naamuupuwela wira yaamukhala etthu yuulupale okhalana mutthu ene owo oosuwanyeyaxa eriyari ahu. Masi olelo hiyo nirina Muluku a Wirimu, kahi eriyari ahu paahi, masi mwa hiyo, akhalaka, akhalaka Ekumi Awe mwa hiyo. Ni hiyo ninnixukhuru saana mwaha wa yeela, Pwiya! Eri yoovikana musuwelelo ahu, veekhai.

<sup>111</sup> Masi vano kilavulaka sa miteko s’okokhorela, ni orowa waAfrika, ni itthu hiyo nimphavelakaahu otthokiha wa mahiku ala vakhani oIndiana nno. Ni mwa enamuna emosa wala ekina, Pwiya, vaamuweryaneya okhala Nyuwo munneetiherya muheemani mmo, wira mwirihe yoowoona eyo omaliheriwa. Tivo otthuna Wanyu wiireye, hiyo noovahererya enamuna yeela, vooreeraxa voosuwela wahu. Tivo hiyo ninnivekela, Pwiya, yaakhanle-ene etthu yoovirikana ni otthuna Wanyu, Nyuwo musuwelihe, wira siiso nisuwele moota wo wira otthuna Wanyu wooloka.

<sup>112</sup> Vano munireerihe mwa minuutu iya vakhani sinttharelana. Mulavule ni hiyo mwa Masu Anyu, Pwiya, maana Masu Anyu Ekeekhai. Hiyo ninvekela mwa Nsina na Yesu. Amen.

Nrowe nimukhunle Bibilia, Marku, kapiitulu 8.

<sup>113</sup> Voolimaleleya okathi xeeni mummalihanyu, ewoora yanamuloko ni piili? [Ookhala oniira, “Ntoko ewoora yanamuloko ni piili.”—Mol.] Vaareera. Vano, vano Mutthaka mwaamukhaani paahi va kikhanlyaaka woolelani wa Masu, numala okhalela onamoona iwe, ni siiso.

<sup>114</sup> Marku, kapiitulu 8, nipacerye versiikulu 34, mpakha 38, nikuxaka 38, ekapiitulu eyo yothene. Okisivela osoma etthu Owo ohimmyawe, okhala wira koosuwela wira ekeekhai. Vano hiyo...

*Nto aahiwiitthana atthu vamosa ni awiixutti awe, khwaahimeerya wira, Akhala onthhuna okitthara, oikhootte mwaneene, nave okapatte mwiikimanyo awe, okitthareke.*

*Maana ole oniphavela woopola ekumi awe enoomurimeela; . . .ole ompweteiwa ekumi awe mwaha wa miyo ni wa ehapari yooreera, owo onimoopola.*

*Nto mutthu omphwanya-ni, waakhela olumwenku wothene, nave khumpweteya munepa awe?*

*Wala onthhuna ovaha exeeni wira aakakhanye ni munepa awe?*

*Tivo akhala mutthu onuuliwa muru mwaha wa miyo ni wa moolumo aka eriyari ya nloko nla nooraruwa ni noottheka; nave Mwaana a mutthu onimuuliwa muru, okathi owo onrwaawe movuwani mw'Atithi awe ni malaikha oowaarya.*

<sup>115</sup> Kintthuna kikuxe yoosoma yaamukhaani vaavo, vakhala wira yaamwiitthaniwa siiso, wiitthaniwa: *Oowuuliwa muru.* Moosuwela, okisivela eyo. “Akhala mutthu onuuliwa muru mwaha wa Miyo ni wa Masu Aka, Miyo kinimuuliwa muru mwaha wa yoowo.”

<sup>116</sup> Vano, nuulumo *oowuuluwa muru* naamuwerya-tho otaphuleliwa ntoko “oovelavela.” Moosuwela, etthu nyuwo. . . Nyuwo munoonana ni etthu munvelavelanyu mwaha wa yeeyo, wuuliwa muru.

<sup>117</sup> Eyo, etthu ekina wuuliwa muru eniiraaya, eyo enooniherya wira khamulimpe ni etthu enihimyaanyu. Mwaasuwelaka etthu enihimyaanyu, ni munakhala oolipa wira munnisuwela enihimyaanyu, munoowerya omuleela khula mutthu yeeyo; khamunuuliwa muru. Masi mwaaisoonaka othanyiwa, ohikhala voopuroni, enooniherya wira khamulimpe.

<sup>118</sup> Nyuwo munniweha wira khereere yeeyo olelo, vanci-enexa wa mwaha kinlavulaaka, “Wuuleliwa muru Masu.” Vano, Owo ni Masu mmosaru.

*Wopaceryani naari Nsu, nto Nsu naari ni Muluku, ni Nsu naari Muluku.*

*Vano Nsu nihiiipaka erutthu, khukhala ni hiyo, . . . Mmosaru nsana, olelo, ni mahiku othene!*

<sup>119</sup> Tivo, “Akhala mutthu onnuuliwa muru mwaha wa Miyo ni Masu Aka,” ni Owo ni Masu Awe ari Mmosaru, tivo wuuliwa muru mwaha wa Masu Awe mwa nloko nla na etampi, “Miyo kinimuuliwa muru mwaha wa yoowo.”

<sup>120</sup> Vano hiyo ninniweha olelo, mutthu ahimya wira, “Nyuwo mwa—mwa muKristu?” Eyo etthu y’atthu othene, wira, “Oh, miyo ka muKristu!” Munnona?

121 “Masi nyuwo munnaamini Masu a Muluku, vatthu Awo ahimyyaya wira, ‘Ithoonyeryo iya sinimwaathhara ale anrowa waamini?’”

122 “Oh!” Hata wiitho wa arumeyi onooxeerya-wo. Munnona?

123 Munuuliwa muru mwaha wa, ntoko, ovoniha wa Muluku? Munuuleliwa muru Ehapari yooreera yoomalela? Munnuuleliwa muru musuwelelo anyu wa pentekosite? Iwo wuuliwa muru mwaha wa Masu Awe. Awo Masu Awe oowiipaka erutthu mwa nyuwo.

124 Tivo, Masu Awe ahaana wiisooniherya Mmansaya wa khula nloko. Yaahiisooniherya Mmansaya mahiku a Moise. Okhala wira, nihiku nenlo, Bibilia oohimya, mwa aHeperi, kapiitulu 1, “Muluku, khalayi ni inamuna sinci-ene aahaalavuliha axitiithi ni moolumo a maprofeta.”

125 Ni maprofeta ale! Ekereja yaahipherya okhala yootapanyeya saana wira okathi. . . Maprofeta ale, anamitthaka awo a Muluku oominyala, jaarwiiye woohikhala ekereja, woohikhala muromolelo, woohikhala mutthenkeso, woohikhhalana etthu; yaahaatharimula mamwene, imwene, ikereja, ni sothene. Okathi anamukuttho jaaruuhiwaya ohoolo. . . Awo jaaruuhiwaya ohoolo w’anamukuttho, awo khayulasiwa muru, okhala wira awo jaarinasa volukama SIISO ANIHIMYA T’APWIYA.

126 Nyuwo mwaweha vale, profeta, mwa moonelo mmosa wa nuulumo, mwa Waataana Wa Khalayi, okathi iiraawe SIISO ANIHIMYA T’APWIYA, vano munwehe, owo aakela ni nuulumo nenlo akuxaka opuro wa Muluku. Nwehe, okathi owo ooniheryaawe, SIISO ANIHIMYA T’APWIYA, owo aakela volukama mwa Muluku, ni iira ntoko Muluku. Nuumala aavaha Mutthaka awe, yoowo aari Muluku alavulaka mwa yoowo, “SIISO ANIHIMYA T’APWIYA!”

127 Kinniwuupuwela maprofeta a khalayi, okathi awo jaarwaya ni Mutthaka owo, ni waanaavelaveliha mamwene, ni waaniwiiriha atthu wiisooni oohikhurunuwa murima. Anamukuttho, hata, yaaniisooni oohikhurunuwa murima, okhala wira yaahaana okhala ahooleli, atthu anatiini, ni okathi awo. . . Masu yaalavuliwaya siiso, Awo yaaniwooneliha, ni yaaniisooni okhala oovelavela, wala oowuuliwa muru.

128 Ni imaara sinci-ene hiyo ninnoona eyo, kahi sinci-ene, imaara soowattaxa olelo! Mulopwan’owo, nyuwo muniira, “Miyo ka muKristu!”

“Muhaakhela Erooho Yoowaarya okhuma okathi mwaaminni anyu?”

“Oh! Ha!” Moone, awo—awo ankhala oovelavela mwaha wa Yeeyo.

129 Mutthu onimwiira, “Nyuwo muniira mpantte wa nikhuru nle iwe ninkumiherya onyakula iwe wothene, ni etthu ele yothene ya ovoniha wa Muluku?” Imaara sinci-ene, aKristu annitthikela ottuli.

130 Awo antthuna ohimya, vakhala—vakhala wira aakhalana muromolelo, vano, “Miyo ka muPatista. Miyo ka muPrespiteriyaano. Miyo ka muLuteraano.” Awo khanuuleliwa muru yeeyo.

131 Masi yaaphiyeryaka okhala muKristu onwerya okupali Masu a Muluku siiso ntoko siryaaya, nto awo—awo—awo annuuliwa muru. “Miyo nkiniira mpantte wa hata muromolelo,” moone, awo, awo—awo annuuliwa muru ohimya yeeyo. Awo ahaana okhala ntoko olumwenku mukina, onthoonyeriwa ni mutthenkeso khata.

132 Vano, naanaanoxa yoophiyerya yeeyo. Mahiku a Lutero, wiisuwanyeiha ntoko muLuteraano wala nammutthara Lutero, vano, eyo yaahimya ohalela okhwa ni ekereja Katolika. Mahiku a Wesley, osuweliwa wira mwaahivirikanya ekereja Anklikano, yaahalela okhala ehukhumu ya okhwa ni mAnklikano, ohimya wira mwaari Mmetotista. Mahiku a Pentekosite, yaari yoowuliha muru, ohimya wira mwaari—wira mwaari muPentekosite, okhala wira naanaanoru mwaalakiwa okhala santu oophirikeya, wala—wala namalavula ilavulelo, wala etthu siiso. Vano awo ahiitthokihia khurowa ni nikhuru nikina.

133 Vano waphiya okathi wo wiitthaneliwa okhuma, muhiniiranyu mpantta wa hata emosa aya! Eyo ti y’atthu othene ohimya wira, “Miyo ka muPentekosite.” Eyo ti y’atthu othene ohimya wira, “Miyo ka muPrespiteriyaano. muLuteraano.” Masi ankhii waphiya okathi murinaanyu okhumaka ni weemererya Masu, “Nkiniira mpantta wa hata emosa wa yeeyo”? Eyo, ennaakhaliha oovelavela.

134 Yesu ohimye wira, “Vano, nyuwo muuliwa muru mwaha wa Miyo, nto Miyo kinimuuliwa muru mwaha wa nyuwo.” Mwaha wa xeeni Owo aarowawe wuuliwa muru mwaha wa nyuwo? Okhala wira munihimya okhala Awawe, nave muhimuttharaka Yoowo.

135 Ankhii kaahimye wira, “Mwammirav’ola, owo—owo mwan’aka”; owo khunarukunuwa khwira, “Aani, miyo mwan’inyu? Munuupuwela wira ki pani!” Eyo yaamukikhaliha oovelavela. Yaammukhaliha, mwan’inyu.

136 Ni ti siiso ni ele eniitthaniwa oKristu olelo. Nyuwo mwahimya nsina na muromolelo, vaareera, awo ankupali otiithi wa muromolelo. Masi waahimmwaka okupali otiithi wa Masu a Muluku, Kristu, nnari, awo ankhala oovelavela. Awo khandthuna wira, “Ayo, miyo koolavula ilavulelo. Ayo, miyo kihoona soowoona. Ayo, miyo kinnaamini ovoniha wa Muluku. Ayo, kinnaattottopela Apwiya. Kootaphuwa wa mutthenkeso

wothene, nkinrowa wuuramela hata etthu wa yeeyo. Miyo ka murumeyi a Kristu.” Oh, wulu, eyo yaamaakherakasa kapatti-kapatti.

<sup>137</sup> Ohiyu uwo, mulipa-oolavula muulupale aahirwa eriyari y’Alipa a Nakoso a Ehapari yooreera Yoomalela oChicago.

<sup>138</sup> Ni mwakitthuniherya weemela vaava minuutu mmosa paahi, wira kihimye ela. Kileveleliwe. Masi imaara sinci-ene nyuwo munnuupuwela, ntoko miyo, yeeyo hiyo enlavulaahu, Ekeekhai ya Bibilia, kkenaakheliwa saana eriyari y’atthu. Masi, Eyo ennihimya. Imaara sikina awo anoovenya vavo evirikanyaka Yeeyo, masi vekeekhai khanlakela. Awo amphavela osuwela veemenlyanyu.

<sup>139</sup> Ntoko ehantisi emosa ya nikhuru n’anamuhapaliwa, yaavaanyihanaka wira khiyaakhanle etthu ene eyo ntoko oKristu. Mulopwana mmosa khwira, “Miyo kinnisuwela nipuro vari mmosa, awo ti amwaar’aka.”

Khwira, “Ahe, miyo—miyo nkinaamini.”

Khwira, “Nrowe, nino. . . nrowe othene niireke ntoko wira khanireere ohapaliwa.”

<sup>140</sup> Khurowa iwe owannyawe, khwiira sothene saaweryaya. Nto—nto kuhimya wira yaapeeliwe mooce, vano nto owo khwiitthela vathi, khwira, “Nyuwo moosuwela wira mooce khankisivela siiso!” Yiiraka siiso mpaani. Nto awo khurowa esaala ekina, khwiirihelala vakhaterani. Awo khumwiiwa mutthu avelaka yeeyo, ahihimyaka hata nuulumo, ahimyaka, aipaka nsipo naamukhaani meekhaawe:

Yesu ohaana okuxa mwiikimanyo mekhaawe,  
Nto olumwenku wothene khuneetta  
wootaphuwa?

Wookhala mwiikimanyo wa khula mutthu,  
Ni wookhala mwiikimanyo wa miyo.

Nto mwiikimanyo yoola woovaheriwa miyo  
kinookuxa,  
Mpakha okhwa okitaphula,  
Nuumala kinoorowa Owaani kaware ekhara.

<sup>141</sup> Namuhapaliwa ole mutokweene khwira, “Kooleenleni exeeni?” Khwira, “Owo muKristu!” Munnoona, awo yaammwehererya paahi. Ni imaara sikina olumwenku, koophwanya wira, onniwehereryani.

<sup>142</sup> Tivo miyo nkinatoko wuupuwela wira ela yaamwiiraneya, masi Esaapatu evinre ohiyu, kookupali wira yaari yeeyo, wala Ttiminku ohiyu, mulipa-oolavula owo muulupale. . . Nkinromolaka masina a atthu. Masi owo omphavela, ovara muteko tthiri voovirikana. Miyo kimpavela okhaliha ikereja iyo ota wa mweettelo yoowo ekumeeniku wa elapo yothene, nto mulopwan’ola omphavela waakeliha mwemmo. Vano,

owo aalavula mwaha wa Alipa a Nakoso aKristu. Yeeyo, yaathuneya wira kikhalanne muthukumano oChicago, ni kuupuwela wira kaamukhala wAfrika okathi ene yoowo, tivo nkaawenrye okhalana. Mulopwan'ola khwira, khuwela vale khwira, "Mweettelo muulupalexa, etthu yuulupalexa mulaponi olelo, etonko okhala; ikereja sothene sintthikela ekereja Katolika, mmweetteloni ekumeeniku, ni aKatolika animwaakhela Erooho Yoowaarya." Ntapha xeeni na xetwani!

<sup>143</sup> Ni muhooleli ola, Munna Shakarian, mukhulupale a Alipa a Nakoso a Mulaponi mothene, aahivenya khwira, mulopwan'ole vamanlyawe okilaathi, khwira, "Kahi siiso hiyo siiwalyahu." Khwira, "Munna Branham oonihimeerya, wira, 'Mweettelo ola wa elapo yothene onrowa waaroiha othene wa ekanyeryo ya nxeni.'" Nto mulopwan'owo okilaanthe-ene vaplataforma. Khwira, "Eyo enimwaaroiha mwa ekanyeryo ya nxeni." Ni khwira, "Hiyo ninuuramela waamini wira enihimyawe Ekeekhaii." Ni owo khwira, "Akavi a nyuwo yaathuna omwiiwa Munna Branham orwa woovahani epantte y'ekeekhai ya yeeyo? Nvenye." Ni yaahikhala atthu ikonto thanu ni etthu. Awo yaahikhuwela ni ovekela, wira kirwe nnari nihiku nimosa, nihiku nimosa.

<sup>144</sup> Munna Carl Williams khukiihana, khwira, "Munna Branham, wulu, miyo kookhuma varyari va muttitthi owo," khwira, "awo yaarina makuttha a inoota sa itoolare emiya yaaheliwe mmatatani mwaka, wira kithume ettikitti anyu ya mmuttekeni yo orwa-no, ni otthika." Moone, ya nihiku nimosa paahi!

<sup>145</sup> Moone, atthu awo, Masu awo ankela nipuro imaara sikina hiyo nihinsuwelahu. Munnona? Masi, moone, nyuwo mwakhalaru tthiri. . . Khivancala moota olumwenku onkhalaya woovirikanya Yaawo, moota miromolelo siryaya soovirikanyana Yaawo, Muluku onnooniherya wira Eyo Ekeekhaii. Okathi ewoora eyo yuulupale vookiserya emphiyaya, sinimwiiraneya itthu khino saahupuwelelahu.

<sup>146</sup> Ayo, enooniherya wira khamukupanli, mwaakhalaka oovelavela, tivo mwaamwamputi muhilavule mwaha ene owo. Mwaarowaka wuuliwa muru mwaha wa yeeyo, khamunrowa otthuna ovaanyihana yoowo; mwiihuluxe.

<sup>147</sup> Masi vanweryaneya sayi mutthu osareiye Erooho Yoowaarya, vanweryaneya sayi mutthu oosareya Owerya wa Muluku, ni ophenta wa Muluku mmurimani mwawe, olavula ni mutthu minuutu vakhani ni ohiromola etthu ya ophenta yoowo ori mmurimani mwawe? Moone, yookhala etthu eni—eniireya; khamukhanle wiiraka siiso.

<sup>148</sup> Nla ti, nihaana okhala nihiku nenlo nootakhala Yesu aalavulawe. Atthu annuuleliwa muru Masu ni Erooho ya Muluku envara muteko mwa yaawo. Masi okathi Ekeekhai

enikhalihiwaya yoowooneya w'atthu, Muluku nto, Mwaneene, aisuuapululaka Mmansawe mwa Masu.

<sup>149</sup> Vano, khula mutthu onoowerya ohimya khula enamuna ya nuulumo. Ni ninnikhalanaka mahiku ala, vaavo sinihimmwaka inamuna sothene sa itthu, vamphiyeryaya okhala yoowoopiha. Masi, moone, yaakhanle-ene Ekeekhai, ehaana okhala ni Masu. Okhala wira, awo annihimya wira yaahikhalana inamuna sothene sa itthu, sa makhura akhwalalaka mw'atthu, ni ephome mmatatani mwaya, ni athiyana ephome ottuli waya, ni eyeehayaka mpakha muxapatthoni mwaya, ni annivenxa ixapattho saya ni oyeeherya makhura, ni anaphulu atuphaka ni athweelaka vaplataforma, ni mithinto sothene sa itthu siiso. Khekhanle etthu ntoko yeeyo mBibiliani. Khaavo natiri a etthu ntoko yeeyo, mBibiliani. Eyo, ehimmye paahi wira, "Mahiku ookiserya, erooho yaarowa okhala yoolattana yaarowaya owoototha ale Oothanliwa vaakhanle wira vaaniweryaneyya." Masi khiyaavo hata Yoolempwa ya yeeyo.

<sup>150</sup> Masi yaahimmwaka Masu a Muluku, ooloka ni oohihononiwa, oolipiheriwa ni Muluku, enkhala wira hata annikhaliha nikhuru nikina noovelavela, epantte ya olipa murima. Moone, yookhala ehaaya mwaha wa Yeeyo.

<sup>151</sup> Masi Eyo ekeekhai wa mulopwana wala muthiyana, mmiravo wala mwaaruusi, vekeekhai okhanle wuKristu ooloka. Okathi Muluku omulampe awe natiri a opatiiso wa Erooho Yoowaarya, ni nyuwo khwaakhela Yeeyo, yookhala Etthu eniiraneya mwa nyuwo, ehinkhalaaya etthu enkuxa opuro Aya. Okathi mutthu onkumanaawe ni Muluku; kahi mwa etthu yoopakwiwa mwa wuukhuwa, evihereryo, wala mwiixuttiho khata wa etiini, katikeesi khata wala eyaaminelo, wala nikano owo okupanli awe yo wi—wiikurunuxa wawe murima, masi okathi vekeekhai oniphiyeryawe nipuro ntoko Moise siiralyawe, ottuli wa mothakoni wu, ni weetta ethoni ni ethoni ni Muluku Oowerya sothene, ni nyuwo khunoona Nsu nilavulaka ni nyuwo, voolikana ni Masu ni natiri a ewoora, yookhala etthu Awo aniwiirihaayani! Moone, nyuwo khamunuuliwa muru mwaha wa Yaawo, Awo anniwiirihani etthu. Vano, nrowe niwehe vano, minuutu muloko ni mithanu paahi sinttharelana.

<sup>152</sup> Aakhala atthu anaakhela musuwelelo yoowo. Ni ntoko sinlavulaaka ni nyuwo olelo, kahi ntoko ekereja wala ntoko muromolelo, kinlavula ni nyuwo ntoko muthu mmosa; kahi mwaha wo wira nyuwo muneetta vaava etapernakulu yeela, mwaha wo wira kinnoophentani ni nyuwo munnikiphenta, kahi mwaha wa yeeyo. Mukihiye kilavule ni nyuwo ntoko mutthu onookhwa, nihiku nlo murinaanyu ophiyaka woomalelani w'ekumi ila. Ni khino miyo nkinkhala vaavo, ni mulaleyi mukina khino khonrowa okhala vaavo. Masi ori Mmosa paahi Yoowo onwerya okumana ni nyuwo iwe, nto owo ti Muluku. Ni nyuwo—nyuwo mmwiwe Yoowo, ni kahi vakhala wira "amwaar'aka

aMukristu ooloka” wala—wala “aiy’aka a muKristu ooloka,” masi, “Kiri oratteene ni Muluku? Kookumana ni Muluku siiso?” Kahi mwaha wo wira “pastore aka oomusuwela Muluku,” wala okhala wira “tiyaakono aka oomusuwela Muluku,” masi, “Miyo kookumana ni Yoowo?” Kahi mwaha wo wira “Miyo kookhuwela,” kahi mwaha wo wira “Miyo koolavula ilavulelo,” masi okhala wira, “Miyo koomusuwela Owo ntoko Mutthu!” Nto khamunrowa wuuliwa muru mwaha wa Yeeyo, yookhala Ethhu ekhanle yooreera voomalela ni yooloka, ni y’ekeekhai.

153 Ni muupuwele, nyuwo pooti okumana n’irooho yaarowa wira ntoko Muluku. Nyuwo pooti okumana ni erooho, yaarowa wira *ela, ele*, wala *ekina*; mutthare vakhani moone moota enlikanaaya ni Masu a Muluku. Vaamuweryaneya okumana ni erooho yaarowa wooleelani wira muhoopowa, ni woovahani moonelo woovuwa, ni munookhuwela ni onyakula; nto yaarwaaka enakhoota Masu, vanweryaneya sayi Erooho Yoowaarya, elempe Masu, okhoota Masu Aya Yeeyo? Erooho eyo ehaana ommaliherya khula natiri a Muluku ni “amen”! Vaahikhale siiso, weeso khimunatoko okumana ni Muluku, mukumanne ni erooho yoowototha. Ni olumwenku khoreerane seiyo olelo!

154 Masi mwaamoonaka Muluku okhuruwa ni ohimya nuulumo, wira Owo onorowa wira ethhu khata, vano eyo enarwa ni wira siiso, okathi p’ukathi, nto vo murina Erooho yooloka ya Muluku.

155 Vanweryaneya sayi Erooho okhala mwa mutthu, Erooho Yoowaarya emulempe Bibilia, vano khunarukunuwa n’ukhootha wira, “Kahi ekeekhai, Eyo yaari ya nihiku nikina”?

156 Owo iirale, “Natiri t’awinyu, ni awaya an’inyu, n’ale ari ottaiwene, othene ale Apwiya Muluku ahu antthunaaya owiitthana.” Eyo yaari mwa Miteko 2:38. Vanweryaneya sayi erooho nto okupali ethhu yoovirikana ni Yeeyo, ni okhala ya Muluku, aHeperi 13:8 ahimye-ene wira, “Yesu Kristu mmosaru nsana, olelo, ni mahiku othene”?

157 Ankhi mutthu iirale, “Oh, kookupali wira Owo aari nafilosofiiya. Owo aari mutthu ooreera murima. Owo aari profetaa. Masi vanaasiwa owerya Wawe. . .”

158 Miyo kaamulavula ohiyu uwo ni George Smith, mmiravo oneetta ni mwan’aka, Rebekah; mwanamwane ooreerela, ohiipa vaava mutapernakulu. Mmiravo mmosa muPatista okunxe paahi. . .iirale, “Nikumihiwe nsina naka mw’ethhu iyo! Nkinthuna okhala nnaata ni yeeyo.” Nto aahikhala mwamuthiyana mmosa. . .Awo jaarina muthukumano, ekereja Patista khata ela, iwe mmatumuxani.

159 Ni—ni awo annikivirikanya voolipa-vo murima, othene aya iwe, ni mwaha wa ohi. . .Awo kharina hat’ethhu ya nthowa ni miyo; ti yoovirikanya Masu ala. Miyo, ntoko mutthu, awo khanwerya okihimiyana hat’ethhu ya nthowa, miyo nkinatoko

owiiriha hata etthu yootakhala. Masi *Yaawo* t'anoovaya. Munnona? Vano hiyo naari. . .

<sup>160</sup> Awo yaarina muthukuman'ola iwe, kiireke, ni yaarina, yaarowa okhalana misiyonaariyu mmosa wira akuxe ohiyu miraru wookiserya wa muthukumano ola muulupale, mmatumuxani wu weiwo waari wooriiry. Khwiiraneya wira, misiyonaariyu ola aaroovenya khumphiyerya Marku 16, nto owo khwira, "Aakhala atthu anci-ene olelo ahinwerya waamini ovoniha wa Muluku." Khwira, "Miyo kaari oHintiya. Miyo ka muHinti. Ni kaari oHintiya okathi aarwiye awe, mulopwana mmosa a oStadu Unidu nno, oniitthaniwa Munna Branham." Pastore khupacerya otthimakasa. Khwira, "Amwaar'aka yaamukhwa mwaha wa kankuru. Kaari ohoona," wala etthu siiso. "Owo khunvekelela mmosa a hiyo, nto mukina khumwiitthaniwa vamuthukumanoni, hata ohisuwelaka nntaava nahu, ni khulavula Owerya wa Muluku." Ni khwira, "Hiyo nri va, oovonihiwa!" Vano, awo yaahiphavela ommaaliha. Khuhiwerya. Eyo, moone, vamuthukumanoni vava vaavale.

<sup>161</sup> Nuumala awo hata yaahikhootta khula etthu. Ni amosa-amosa wa atthu, hata yawaka. . . murokor'awe mmiravo ola, ale nipuro nenlo, khayaahimnye nnakhala etthu. Awo yaatthuna osuwela sintoko owo khaaluttanne, mwa enamuna emosa wira awo awerye orwa nno athokose.

Mmosa wa ahano khwira, "Ahe, miyo kinnaamini."

<sup>162</sup> Rebekah ni George khurowa omoona muhan'ola. Nto owo khurowa khimuruuha mwali mmosa aahaaxeya ni e—e. . . muthinto mmosa wa ovahuwa, vakhani. Siiso awo khukivekela wira kirowe weiwe kamoone mwali uwo, ohiyu uwo. Nto miyo kirowa mpakha weiwo, mwaamuthiyana aakilanthe vaavo, nto miyo khwira, "Nyuwu mwa mulipa-oowaamini?"

<sup>163</sup> Owo khwira, "Nnari, nkisuwenle kaaryeene yoowo wala nnari." Ahe, owo khaavahunwe; yaari erooho ya xetwani paahi. Awo khansuwela. Moone, eyo enimoovarani, ni nyuwu khamunsuwela. Eyo enookela, nto owali onoomuxintta mutthu, nave awo khansuwela.

<sup>164</sup> Athiyana ankhumela nno mphironi, yaawanre-ene akaputtula ala, awo khansuwela. Awo yaamuwerya okhala, yaamuwerya wooniherya ni olapha, wira khanatoko wira etthu yootakhala wa aiy'aya, wala sikina, siiso. Masi mmurimani mwaya, awo khansuwela, masi erooho ya xetwani ehaavara. Aavariwa ni yeeyo. Mwaha wa xeeni muthiyana aarowawe otthunaka orula ikuwo sawe, ohoolo wa mulopwana? Ori mutthu mmosa paahi iirale, mBibiliani, ni awo yaari alolo. Akina aneererya wiikhuneela; awo khansuwela. Ti yoocencyaxa, y'olavilavi saana! Muhaana oweha, wiiphima ni Masu a Muluku, ni woona veemenlyanyu.

165 Mwali ola khwira, “Oh, kileeliwe wira kipatisiwe okathi waaryaka mwanamwane.” Khwira, “Nkisuwenle sintoko kihaana waamini etthu iyo wala nnari.”

Miyo khwira, “Khimunimwaamini Yesu Kristu?”

166 Nto owo khwira, “Ahe, nkisuwenle sintoko kinnaamini wala nnari.” Owo khwira, “Itthu iyo sa ohimya-himya, nkinaamini.”

167 Miyo khwira, “Ahe, vekeekhai, khamunaamini itthi iyo sa ohimya-himya.” Miyo khwira, “Masi nyuwo munnaamini wira Owo aari Mwaana a Muluku?”

“Oh,” khwira, “Owo aamuwerya wira okhanle-ene.”

168 Miyo khwira, nto miyo khwira, “Nyuwo munnaamini wira Owo mmosaru olelo, Muluku aarowa owoopolani?”

169 Owo khwira, “Itthu seiye sinihimya sa miiriirya ni itthu siiso? Miyo nkinaamini hat’etthu ya yeeyo.”

170 Nto miyo khwira, “Mwaarowa wira exeeni mwaakilaanthe vamuthukumanoni munamoonna Muluku, Erooho Yoowaarya, okhanle Muluku mmosa paahi okhanle, avaraka muteko eriyari y’atthu; Muluku mwa o’Tiithi, Nripu na Mooro, ni maprofeta; Muluku mwa Mwan’Awe; nuumala Muluku mwa atthu Awe? Iyo mikhalelo paahi sa Muluku, Muluku mmosa muulupale Yoowo onkhuneela Ehimalelo.” Miyo khwira, “Mwaarowa woona exeeni Owo, eriyari y’atthu Awe, aamwiirinhe—mulipa-oohoona woona, ahiwa wiiwa, oweha muthukumano ni waaleela atthu etthu yaavonyeie ni yaawo, ni ntoko Owo siiralyawe okathi Owo aaryawe muumu elapo ya vathi?”

Owo khwira, “Kookupali wira yaamukhala ehako.”

171 Miyo khwira, “Nyuwo muri ni mukhalelo wootepa ovikana suupuwelaaka. Vaamureerela mwaakhanle nanvahuwa, moone, khimwaarowa okhala oothokorerya.” Masi miyo khwira, “Nyuwo muroovariwa paahi n’irooho yootakhala.” Miyo khwira, “Okathi Yesu omuhimenryawe muthiyana veehimeni mwaha w’axiia awe, okathi Owo aawehakawe atthu ni osuwela miyuupuwelo saya, mwaamwiitthana yeeyo ehako?” Moone, oputaputeleya mmuromoleloni, oniitthaniwa Luteraano, wira etthu p’itthu yoovirikana ni yeeyo yaamukhala yoovonyeya!

172 Vano Muluku ommutthuna mutthu oputaputeliwe mwa Masu. Etthu p’itthu yoovirikana ni Yeeyo ti yoovonyeya! Yesu ohimye wira, “Moolumo othene a mutthu t’owootha, nto Awaka ti Ekeekhai.”

173 Aahikhala mulopwana mmosa okathi mmosa wa siyensiya saana, iitthaniwa Nowe. Owo khuuleliwa muru Masu a Muluku. Muluku aahikumana ni yoowo, ni Owo khulavula ni yoowo. Owo aahisuwela wira aari Muluku. Nto Owo khwira, “Enoorowa orupa epula!” Khiyaatonko orupa epula, masi owo aahaamini wira yaamurowa orupa epula. Ni waamini owo aarinaawe, owo khuuleliwa muru wooniherya yoowo. Saamukunxe iyaakha

emiya ni miloko miili wira ateke ekalawa, okathi olumwenku waaryaaya woonvirikanya. Owo khuuleliwe muru Masu a Muluku, nihiku nawe. Muluku aahimooopola owo ni etthoko awe, mwaha wa yeeyo. Yaahikhala e... Moota enkhalaaaya ntoko ololo w'atthu akina; masi, wa owo, owo aakumanne ni Muluku. Khivancala moota xeeni mukina aaryawe a siyensiya, yaari yoovirikana, moota yaahimaya wira "khivaaweryaneya wiiraneya, khivaaweryaneya wiiraneya," owo aakumanne ni Muluku!

174 Ti siiso eryaya mwaasuwelaka wira munlavula ni Yoowo! Nyuwo mwaamuupuwela wira yaari etthu y'elolo okathi mutthu... Kaasuwelaka wira ari atthu vakhani mulaponi anvarelela ele enihimiyaka wira Ekeekhai. Weemela va ni wira, "SIISO ANIHIMYA T'APWIYA, kinrowa w'Arizona, iwe kinrowa okumana ni Malaikha mathanu na maili munikhuruni," ahe, naahikhala nikhuru n'axilopwana yeemenle vaavale wira yoone eyo wiiraneya. Ohiyu umosa, kihimiyaka wira, "Los Angeles aamurowa osama mphareya yuulupale." Masi nyuwo mwakumana-ru ni Muluku, ni Muluku Yoowo ohinvonya, Muluku Yoole oniira oratta-ene ele Owo ohimmyawe wira aamwiira, siiso Owo kweekwe oniirakaawe, khamunuuliwa muru mwaha wa yeeyo nto. Khamurina otthikelaka ottuli ni ovelavela mwaha wa yeeyo; munoowerya ohimeerya olumwenku wothene. Mutthu akumana-ru ni Muluku, owo onlavula ni Yoowo, ni ekeekhai ya Muluku enkhalaa yawawe mmurimani mwawe, owo khonuuleliwa muru Yeeyo.

175 Nowe khuuleliwe muru. Yaakhala ntoko ololo wa olumwenku mukina, masi kahi wa yoowo.

176 Moise, okathi waaryawe ohoolo wa Farawo, owo khuulewe muru omuleela Farawo wira itthu kamosa-kamosa iya saamukhumelela, okhala wira owo aahikumana ni Muluku. Muluku aahimuleela, vamwiiwani waavarela. Moise khwira, "Ki-kinnikukuma." Ti yeeyo owo aarinaawe, ekhoottiheryo ya olavula.

177 Owo khwira, "Vale onrwa Aroni. Nyuwo munookhala Muluku wa yoowo, ni owo onrowa okhala profeta wa nyuwo. Koosuwela wira owo onniwerya olavula oratta-ene. Masi Miyo kinookhala ni eyano anyu. T'ani omwiirinhe mutthu olavula?" Amen. Okisivela eyo. Owo Mulukuu. "Tani ompanke mutthu ohiniwa wala ohinlavula, wala taani ompanke mutthu onlavula?" Muluku.

Owo khwira, "Pwiya, mukoonihe ovuwa Wanyu."

Khwira, "Exeeni iyo mmatatani mwanyu?"

Owo khwira, "Ela ekopo."

178 Khwira, "Murihele vathi," eyo khuthatuwa enowa. Khwira, "Nvare-tho," eyo khuthatuwa ekopo. Amen. Owo Mulukuu. "Muhele ntata nanyu vatthirima." Owo kuhela,

khukumihla, nootteelela ni maretta. Khwira, “Muttikele ohela-vo ni mukumihe,” nto naari ntoko ntata nikina. “Miyu ka Muluku.”

<sup>179</sup> Vano owo khweetta mpakha ohoolo wa Farawo ni khuhimya etthu Owo aamuleenle awe wira ahimye. Owo khwira, “Enrowa wiireya *ela* ni *ela*.” Khukuxa mithaaka khurihela osulu, khwira, “SIISO ANIHIMYA T’APWIYA, ithotomwa sirwe elapo ya vathi,” vano ithotomwa khurwa. Khukuxa maasi khuyeeherya mmuro, khwira, “SIISO ANIHIMYA T’APWIYA,” ni miro sothene ni sothene khukhala ephome. Khwiithana wira amore maralala okhuma wirimu.

<sup>180</sup> Moosuwela, mahiku ookiserya ihasara iyo sihaana otthikela-tho. Ni muupuwele, namararuwa, okathi wa Bibilia, ehukumu awe waari okhwa mwaha wo ovonyiwa ni Muluku. Ni ekereja yooahaamini enrowa ovonyiwa ni maluku mpakha okhwa, ni makotto a maralala, yeeyo yaatonko okhala enamuna ya ehukumu ya Muluku. Owo onoovonya ni maluku olumwenku ola woohaamini, nloko nla nooraruwa. Owo onrowa ovonya okhuma wirimu, ni maluku a maralala anlemela etalento emosa khula nimosi sikhanye ikhiilu miloko mixexe ni thanu. Ekereja yooraruwa enimookhwa, olumwenku wooraruwa onoorowa okhwa vathi va ehukumu ya Muluku, yoovonyiwa ni maluku, ntoko Owo siiralyawe wopaceryani. Mwiireherye ni Muluku, ekereja! Ti yeeyo hiyo othene erinaahu wira, otthikela wa Muluku!

<sup>181</sup> Eliya mutokweene owo a wiitho wa mairi, ireru soottweelela, nantari, miyoono soowoottaseya, a miyaakha miloko mithanu na miraru okilaanthe-ene iwe mothakoni, awehaka itampi s’atthu. Muluku khulavula ni yoowo voosiisu umosa, khwira, “Mukhuruwele iwe mwamuhimeerye Akhabi wira nnakhala okame khummora okhuma wirimu nyuwo muhihimmye.”

<sup>182</sup> Kinniwerya wona maitho awe makhaani awehaka vathi mwa ireru iye sootteelela, ekopo ele mmatatani, eettaka mphironi ntoko mmiravo a iyaakha muloko ni thanu na mosa. Khurwa mpakha ohoolo wa mwene, khwira, “Nnakhala okame khonrwa okhuma wirimu miyo kihihimmye.” Owo khuuleliwe muru Muluku nnakhala Masu Awe; omuleela mwene wala mutthu ti mutthu mukina. Owo khuuliwe muru. Owo khaarina yo wiipitha, wira, “Vano, Akhabi, nyuwo mwaamukhala e . . .”

<sup>183</sup> Eyo enikuupuxerya etthu ntoko yoohi. Vano miyo khwaahimeerya atthu, “Kimphiyerya nipuro, kintthunaxaaka waamini.” Mwaha wa yeeyo kiryaaka owaani vano wira kikhallane esukhumelo ekina ya waamini.

<sup>184</sup> Enkhala ntoko, yoophiyerya nipuro, yaavekeleliwaka atthu, nyuwo munveka muswammaha, “Mwenye Xetwani, xontte mwaamuwerya osusa mukihye . . .?” Nnakhala! Waamini ohaana mitika, ni mairi vatthirima. Owo waalavulaka, itthu

sothene sikina sinoomaala. Muhiroweke ni, “Mwenye Xetwani, mwaamuwerya osusa?”

<sup>185</sup> “Khumani va! Miyo ka mwaana a Muluku, oorummwa ni Muluku. Mwaahiye mmansaya!” Eyo ennimususiha. Khonvekeliwa muswammaha xetwani, muhikhaleke nnaata ni yoowo. Muhuuleliweke muru Masu a Muluku, muhuuleliweke muru orummwa wanyu, nihuuleliweke muru ole hiyo nikhanlyahu.

<sup>186</sup> Wuuliha muru omosa kirinaaka, miyo okhala Branham, iwo oyariwa waka wa vathi. Kinnuuliwa muru mwaha wa soovonya saka.

<sup>187</sup> Masi ntoko murumeyi Awe, nkinuuliwa muru! Nkinuuleliwa muru Masu Awe. Hata sikhalaka miromolelo, mamwene, makhulupale, wala enakhaleru exeeni; oolikana paahi wira kaakhule, Muluku onniitthanela yeeyo.

<sup>188</sup> Moise aahiphiya ohoolo wa Farawo. Owo khuuliwe muru omuleela wira awo khiyaarowa wiisakaleliha wira yaamukupali mahiku *khata* mothakoni.

Owo iirale, “Athiyana kamosa-kamosa ehale, ni an’inyu.”

<sup>189</sup> Khwira, “Othene ahu ninoorowa! Hata niphita khaninhala ottuli, ninookuxa inyompe sahu ni sothene.” Owo khuuliwe muru. Mwaha wa xeeni? Owo aarookela moWaaryani wo ovuluxiwa.

<sup>190</sup> Mwaha wa yeeyo mulopwana wala muthiyana, muretta wala etthu p’itthu, ahala-ru okela Ohoolo wa Muluku, ni onasuwela wira Muluku ohaavoniha, nyuwo munkela moWaaryani mwa ovuluxiwa. Nyuwo khamuniisakaleliha ni hat’etthu.

<sup>191</sup> Ovuluxiwa waari mmurimani mwawe, okhala wira aahikumana ni Muluku Yoowo iirale, “Miyo ka Muluku a Abrahamu, Yoowo aanvanhe Abrahamu natiri. Ni okathi, okathi wo ovuluxiwa, wo woopoliwa, ori vakhiviru. Miyo kinoorurmani iwe wira mwaakumihe-wo.” Xeeni ovekaka muswammaha, mwaha wa yeeyo?

<sup>192</sup> Farawo aamuwerya wira omwiivale. Owo aari mutthu paahi. Owo aari epottha. Owo aamuwerya wira omwiivale. Masi owo khuuleliwe muru Masu. Owo khaaruuule khukokhora amuxontelaka Farawo mwaha wa hat’etthu. Owo iirale, “Miyo kirweenle waakuxa.”

Farawo khwira, “Ahe, nyuwo khimukhanle waakuxaka!”

<sup>193</sup> Owo khwira, “Vaareera, weeso sinookhala ithotomwa mulaponi, mpakha munrowaanyu oviraka mwa seiyo.” Ni yaari yeeyo yiiraneiyee.

Khwira, “Oh, Moise, mwaakuxeke!”

Khwira, “Vaareera. Vano nyuwo munoorukunxa murima?”

Khwira, “Ahe, muroweke orowa mahiku *khata* mothakoni.”

<sup>194</sup> Owo khwira, “Vano iphepele sinimoorwa.” Amen. Khwira, “Ewiriphi enimoorwa.” Waari wooriipelaxa vahaaweryaneyaya woona nipuro nimosa wa nikina.

<sup>195</sup> Nto vookiserya okhwa khurwa. Okhuma Farawo mpakha murumeyi, waari okhwa wa mwaana oopacerya a mw’emusini. Khaanvekenle muswammaha hata mutthu. Owo aari mwaana a Abrahamu, aayariwe mwa Erooho ya Muluku, aarummwe ni Muluku, Mutthaka wa Muluku, wira orowe aakumihe atthu ale.

<sup>196</sup> Ahe, Muluku khokhanle wiitthanaka enamuna emosaru okathi ula, wira amukumihe Mwaakameliwa mukereja?

<sup>197</sup> Daniyeli khaari, ahiiso, Davidi, kiireke, khoovale ohoolo wa Sawuli. Okathi atthu othene yaamoovaaya Koliyathi iwe, owo khoovale okhuma arowaka. Ni iirale, “Murumeyi anyu. . .” Mwammiravo ola owooneya woottaseya iirale, “Murumeyi Anyu aasukiha ipwittipwitthi s’atithi awe, ni ekhaya khurwa khuvara emosa aya. Miyo khwiikara mothakoni khwiiva, ni pharancikula ola. Mwatto khurwa.” Oh, wulu! “Mwatto khurwa khuvara emosa aya, khutthyawela mothakoni, khummana ni pharancikula. Okathi ovennye awe, miyo khumwiiva.” Owo khwira, “Nto Muluku. . .” Mwene ole oothikela ottuli eemenle vale, masurtaatu ale oohilakeya yaahimya wira yaamurumeela Muluku a Wirimu, ni emutthuniheryaka muFilisti ole oohilya masoma weemela vale ni waatharimula anakhotto a Muluku mukumi. Khwira, “Murumeyi anyu onoomwiiva nave. Okhala wira, Muluku Yoowo okivanhe mwatto ni ekhaya, nave-tho onookivaha muFilisti ole oohilyihiwa masoma.” Owo khaakukummne, ni khiirale, “*alakela* enimwiiraneya.” Owo iirale, “Enimwiiraneya!” Owo khuuliwe muru.

<sup>198</sup> Daniyeli, ohoolo wa mwene, khoovale ovirikanya sooruma sawe wira khaavo aarowa ovekela, woohikhala wa yoowo. Owo aahunle icanela ni khuvenxa ipersiyana, ni aavekelaka vaara vararu nihiku nimosa. Owo khoovale.

<sup>199</sup> Satraksi, Mexaki, ni Apeti-neeko, khayaamovanse ttukuttha ole a mooro. Yiiranse, “Muluku ahu onniwerya onoopola. Muluku onniwerya onoopola. Masi Owo aahinooopole, hiyo khinnuuramela elatarato anyu.” Awo khayuuulelasiwe muru yeeyo. Nnari, mulopwana. Nnari, mulopwana. Vekeekhai awo khaayuuulelasiwe muru yeeyo, okhala wira awo yaanisuwela.

<sup>200</sup> Sansoni khuuliwe muru ohoolo w’aFilisti. Okathi atthu ekonto emosa yaamutthimakenle aya, owo khukuxa nikhuva na nanttere a muula. Ni ikapaseeti iye, saarina isentiimeturu piili ni nuusu sa mwiitti, sa eporonse. Owo aahaamana ekonto emosa ni yeeyo, ni nlelo aahikhalana nanttere owo mmatatani. Owo khaavelavenle. Owo aakunxe paahi ele yaari mmatatani mwawe, nto khupacerya ovara muteko ni yeeyo. Owo aanisuwela wira Erooho ya Muluku yaari mwa yoowo. Aanisuwela wira aayariwe muNasiri. Aanisuwela wira khiyaavo yaakhanle omuhaaxaka.

Owo aari murumeyi a Muluku. Vakhalaru wira aari mwa otthuna wa Muluku, khiyaavo yaawerya weemela mphironi mw'awe, khivaacala mamwene makavi wala aFilisti, wala etthu p'itthu ekina yaakhumelela. Khweeli.

<sup>201</sup> Yohani khuuleliwe muru Masu a Muluku yaamurwenle yoowo mothakoni, khimuleela wira arowe apatise ni maasi. Owo khuuleliwe muru ohimya wira, "Ola Mwapwittipwitthi a Muluku onttopiha itampi sa molumwenkuni," okhala wira Erooho ya Muluku yaari mwa yoowo. Owo khuuleliwe muru ohoolo w'anamukuttho.

<sup>202</sup> Owo khuuleliwe muru Masu a Muluku okathi owo oronwe awe wa Heroti. Mwaara a Filipe aakhala ni Heroti. Aarowa olukama ohoolo wa mwene! Mulopwan'ola a wiitho wa mairi a mothakoni iwe, aakhumme iwe, ahisomme wala etthu ekina, khurowa olukama wene wa Heroti, khwira, "Khivamphwanela nyuwo omukuxa!" Owo khuuleliwe muru Masu a Muluku. Vekeekhai. Owo khuuleliwe muru Yaawo mara.

Sitefano, owo khuuleliwe muru Masu a Muluku.

<sup>203</sup> Yoopacerya, atthu apentekosite iwe Nihiku na Pentekosite, okathi yaathukumanne aya empa y'osulu, erooho Yoowaarya yaahaakhuruwela, ni natiri a Muluku. Luka 24:49 ohimmye wira:

*...vano, miyo kinimoorumihelani natiri a Atithi:  
masi mulipelele...mpooma mwa oYerusalemu, mpakha  
waakhela owerya okhumaka wirimu.*

<sup>204</sup> Ni natiri ene yoowo Masu a Muluku yaalaihennyaya, "Vano, Miyo kinimoorumihelani natiri a Atithi Aka, masi mulipelele iwe; muhimphavele-tho teyoloxiyya wala osoma, ni sikina, mulipelele mpakha mwaakhele Owerya." Nto okathi Owerya iwo wa Wirimu orwiye aya, ntoko ephayo enoopa n'ikuru, awo khayuleliwe muru Ehapari yooreera.

<sup>205</sup> Petru aahivenya, khwira, "Murukunxe murima, khula mmosa a nyuwo. Nyuwo alopwana, a matata ootakhala, moomukhomela Mwene a Murettele, Muluku omuhimunxe awe mw'alipa-ookhwa. Ni hiyo n'anamoona. Okhala wira ti yeeyo Yoweli aahimmye awe wira yaamwiiraneya mahiku ookiserya, 'Miyo kinimwaamwaraxela Erooho Aka atthu othene.'" Owo khuuleliwe muru Ehapari yooreera.

<sup>206</sup> Sitefano mwaamukhaani, ntoko sihimmye aka minuutu vakhani sivinre, okathi oovinre awe iwe ntoko m—m—mwanankhaya. Owo khaari mulaleyi. Owo aari tiyaakono paahi, masi aanikhalela onamoona mapuro othene ohihimuwa. Owo aakumanne ni Muluku. Ni eri ntoko. . .

<sup>207</sup> Weererya omweemexa? Ahe, waari ntoko weererya ottipihya e—empa, empa envya, ottipihya mooro mwa yeeyo, nihiku n'etthekeu, okathi wa elimwe. Vano, khula okathi etthekeu yaarumaya, waapatta mooro mukina tu.

208 Awo yaaroomukuxa empurulelaka Omuthukumanoni wa oSineetriyu. Nyuwo munniwerya osuwela exeeni iyo? Eyo eri ntoko Mwaataano Ekumeniku. Itiini sothene siniwelela, Mwaataano Ekumeeniku. Ni sothene iwe saaiwelela Muthukumano wa Sineetriyu. aFarisi, aSatukhi, a Heroti, etthu p'itthu yaaryaya, awo yaahaana okela mmwaataanoni mwemmo. Nto awo yaaroompurula, kahi mutthenkeso mmosa paahi, masi mwaataano muulupale waahimpurula. "Ninrowa omututuxa mpakha hapa awe okhuma."

209 Okathi orwiyaawe, voosiis'uwo, Bibilia ohimmye wira ethoni awe yaakhala ntoko Nlaikha. Owo khwira, "Alopwana n'axinna, mukihye kilavule ni nyuwo. Axitiithi ahu yaakhala oMesopotamia ehinatthi orwa oHarani," siiso. Owo aamutthikela ni ovaha Soolempwa. Nto okathi okhanlyawe oowuupuxeriwa saana, Erooho yaahimurweela, owo khwira, "Nyuwo oolipa murima, oohinnuwihwiwa murima ni maaru, nyuwo munikhootta Erooho Yoowaarya; ntoko siiralyaya axitiith'inyu, siiso muniiraanyu nyuwo." Owo khuuleliwe muru Ehapari yooreera, khuuleliwe muru Masu. Owo khaakhanle oovelavela ohoolo wa hata Muthukumano wa Musineetriyu. Nnari.

210 Paulo aahihimya ohoolo wa aKripa. Aryeene muYuta, ooxuttihiwa ni Kamaliyeli, owo aari oottittimihiwa muulupale. Masi nihiku nimosa, eettaka arowaka oTamasiku, owo aahikela Ohoolo, okumana ni Muluku. Nlaikha naahikhuruwa okhuma Wirimu, mwa mukhalelo wa Nripu na Mooro, Waarya waammoroxenle vathi. Khuvenya, khwira, "Pwiya, Nyuwo mw'Ani?"

Nto Owo khwira, "Miyo ka Yesu."

211 Eemenleene ohoolo w'AKripa, owo aahitthikela-tho yookhumelela eyo. Owo khwira, "Nkinuuleliwa muru Ehapari yooreera ya Yesu Kristu, okhala wira Eyo ti Owerya wa Muluku onoopola, w'ale othene anaamini." Vekeekhai.

212 Vano, apatthani, naamutthikela siiso ni axilopwana, moovirani m'okathi, masi okathi woonivira.

213 Masi mukihye kihimye ela. Mutthu otonko okumana ni Muluku, yoowo okhanle Masu, ni Masu khukhalihwiwa oowooneya ni oowooniheriwa wa yoowo, khiyaavo eyuuleliwo muru mwaha wa yeeyo. Khamunkhala oovelavela. Khenkikhaliha oovelavela ohimya wira kinnaamini Masu othene a Muluku. Khenkikhaliha oovelavela Apwiya yaahimya wira muhimye etthu, nyuwo munarowa ohimya ni wira; khenkivelaveliha ohimya wira koosarihiwa Erooho Yoowaarya; khenkivelaveliha ohimya wira koolavula ilavulelo sikina; khenkivelaveliha ohimya wira Pwiya'ahu ookooniha soowoona; khenkivelaveliha ohimya wira Owo mmosaru nsana, olelo, ni mahiku othene.

214 “Mwaruuhiwa ohoolo wa makubernatooro ni mamwene, mwaha wa Nsina Naka, muhuupuwelele etthu enrowaanyu ohimya, okhala wira munoovahiwa okathi yoowo. Khamuhiyo nyuwo munlavula, masi Atithi Aka ankhala mwa nyuwo. Masi akhala mutthu onuuliwa muru mwaha wa Miyo ni Masu Aka, mwa nloko nla, Miyo kinimuuliwa muru mwaha wa yoowo ohoolo w’Atithi Aka ni Malaikha oowaarya.” Muluku munikhaliherye wira nihuuliwe muru, masi munikhaliherye okhala onamoona mukumi.

215 Khula mutthu mwa Waataana Wa Khalayi, okathi maprofeta ale yaaruule aya, awo yaaphiyenrye—awo yaaphiyenrye okhala Masu makumi. Awo yaari Masu. Yesu ohimye wira awo yiithaniwa amuluku, ni yaari yaawo, okhala wira Masu a Muluku jaarweenle yaawo. Awo yiira, “Eyo ti SIISO ANIHIMYA T’APWIYA.”

216 Ni khula mwixutti a Kristu ophiyenrye okumana ni Yoowo mwa ovuluxiwa, ni woopowa okenle mmurimani mwawe, owo ookhalana Muluku. Ni enamuna xeeni ya makhalelo naarinaahu okhalaka, ni moota xeeni naarinaahu weettaka, ni moota xeeni waarinaahu olavulaka, vakhala wira Muluku oniithoonyerya Mmansawe mwa irutthu sahu sinkhwa? Taani aakhanle wuuliwaka muru mwaha wa yeeyo?

217 Vaaakhanle wira kaahiphierya okhala mupiliisa oJeffersonville nno, kineetta mphironi, ni okhulupale wothene, nkaarowa wuuleliwa muru epooma. Kaamukhala epantte ya epooma. Kaamukhala mupiliisa, epantte ya epooma, wira kikhaliheke mmaaleleyo ni mweettelo wooreera. Mutthu aavinre-ru ni luuxu ooxeerya, nkaarowa wuuliwa muru omuleela wira ohiira yoonanara, kaamunvaha muulutha. Owo muteko aka, okhala wira ki—kinnilinvwa ni epooma. Kinkhala mwaha wa epooma. Kookhalana okhulupale wa epooma. Voohicala sintoko aarohapaliwa, wala exeeni yaari mulattu ni yoowo, awo annikaakiha. Miyo kinkhala oolipa ni voopuroni, okhala wira ka mupiliisa ni or- . . . Miyo koorummwa, ahiiso kooheliwa va ni koovahiwa okhulupale wira kiire yeela. Muhaana okuxa malamulo ni ihakhi, n’itthu siiso, ni woona wira sinniiriwa oratteene.

218 Nto, kaari muKristu ni kikhala oosareya Erooho, kikuxaka onamoona wa ohihimuwa wa Yesu Kristu, wira Owo mmosaru nsana, olelo, ni mahiku othene, muhimuhiye hata xetwani woosukhumani, wira, “Nyuwo khamuniira *ela* ni khamuniira *ele*.” Nyuwo mwiire Eyo. Muluku ohoovahani e . . .

219 Moone, hiyo khanirina owerya. Mupiliisa owo khorina owerya wo weemexa ekaaro emosa. Eri ntoko . . . imaara sikina mitooro sa ikhavalu imiya tthaaru wala xexe, owo aarowa wira exeeni ni yeeyo? Masi owo oohaana okhulupale.

220 Nto eyo Ekereja. Hiyo nihaana okhulupale, wa ohihimuwa wa Yesu Kristu ni Masu Awe oolaiheriwa, aleluya, “Itthu Miyo sinvaraaka nyuwo munoovara nave; soovikana iya nyuwo munoovara, okhala wira Miyo kinrowa w’Atithi.”

221 Muhuuliwe muru mwaha wa Yoowo mwa nloko nla; na etampi, noovela-vela, nloko nookiserya ninrowa okhala mulaponi ti na etampi, nooraruwa, ni noosareya makhwatta othene oowunta. Yothene, sothene saari soophwanelela sookhala soohiphwanelela. Ipoliitika sa mulaponi, soonanara! Ilapo soohononeya.

222 Wu muhina wa itakhwa sa wAfrika, anamaxaya a safari, yaahaana waakuxa araatiyu a ikuru wira emwiiweke Elvis Presley, Pat Boone, n’aximiravo ale ni rock-and-roll owo ni twist. Ni axineene elapo, ephavelaka owoona yiiraka siiso, ettikinyaka muru aya ni yiiraka siiso, axineene elapo yaaneemela ni waaweha. Masi, nyuwo moone, awo kahiyo atthu a wAmerika ntoko Pat Boone, ni Elvis Presley, ni Ricky Nelson, ni ntoko aximiravo ale. Awo kahiyo kahiyo muthinto yoowo wa aYuta, masi awo a . . . Moone, eyo eroohoo. Ni erooho kheri wAmerika paahi, eyo emwareenle molumwenkuni mothene, wira yaaroihe okhottoni ya Harimaxetoni. Awo aniira siiso, hata akhalaka . . . Khula elapo ankhumaaya-wo, wAfrika, oHintiya, onakhalaru vayi, ohilakeya iwo ni itthu soomwareela mulaponi mothene, mwaha wa mutthu mmosa paahi opacenrye.

223 Siiso-tho Ehapari yooreera ni Owerya wa Muluku Oowerya sothene, woomwareela molumwenkuni mothene! Ni okathi wo ovalaana onimwiireya vano, okathi Muluku onimwiitthanawe Mwaakameliwa, ni xetwani oniitthanawe ekereja. Mukihiye kikhale epantte ya Mwaakameliwa!

Nivekele.

224 Muluku Oophentiwa, hiyo ninnoona yoolempwa vaxirini, Pwiya. Hiyo nri okathi wa wookiseryani. Noosuwela wira sinniniwehererya itthu suulupale, masi nnakhala vo nipuro nlo, nipuro nlo mwa evitikavitika ela, nlelo aakhala atthu a nneema atthomeliwe Ekumi. Yaamukhala yoohiweryaneya mulopwana mmosa wala aili; masi, Muluku, hiyo othene vamosa, munitthuniherye nimwaraxele khula nlootho ninweryaahu, ihapari sooreera wira Yesu onimoorwa, ni, moone, omwaraxa Mukatthe mukhaani paahi, Nuulumo nikhani. Vari Axawawe, awo anoothara Yolya eyo. Hata Eyo erwaaka ni efiita, wala sinto Eyo enrwa ni nuulumo wala onamoona, Axawawe anoothara mpakha nipuro Naya nuulupale. Maana Yoolempwa, “Vari Murutthu, vaavo t’anthukumanaya Axawawe.” Yesu Oophentiwa, noosuwela wira Nyuwo mwa Murutthu onlyaahu. Nyuwo mwa Nsu, nto Nsu nihiipaka erutthu khukhala ni hiyo. Hiyo ninnivekela, Muluku, wira naamwaryaka Masu, Axawawe eekeekhai ephwanye Yaawo.

225 Nihuuliwe muru okathi onkhalaahu ohoolo w'atthu, ootakhala, oohicaliwa, anatiini, etthu p'itthu. Ntoko Paulo saamuhimenryawe Timoteyo:

*...Nikhale oothipeleliha okathi aya, woohikhala okathi aya; ovaanyiha ni opwapwela, ni...ni ovilela wothene ni mwiixuttiho.*

*Okhala wira onoophiya okathi awo ahinrowaaya otthuna wiiwa mwiixuttiho wooreera; siiso owaruni onrowa waaneenaka...animwiithukumanyerya vamosa, awiixuttihi;*

*Ni anookhootta...ekeekhai,...iantisi.*

226 Muluku, hiyo ninkhala nihiku nenlo. Nyuwo mookitthuniherya okhala okathi woophiyerya wira koone eyo wiiraneya. Siiso, eyo emphwanyaneya vaava va vanlukuni n'olipiha na etapernakulu ila olelo, ya miyaakha miloko miraru ni miraru sivinre.

227 Muluku, mmureerihe khula mmosa mu. Akhala mmosa mu, Pwiya, ohilikanne wira okumane ni Nyuwo, ohinwerya wiiraana ni Masu Anyu, ni khanatthi woosuwelani ethoni ni ethoni ni osuwela wira Nyuwo khamuhiyo eyiirelo ya muthinto khata ya e—ya e—ya ekupalelo, ntoko enaakheliwaya eyaaminelo wala etthu siiso, masi wira aamusuwela Muluku mukumi; nto vakhala wira awo khayiirale, Pwiya, awo yiire naanaano va.

228 Miyo—miyo kinnaamini wira Nyuwo muri—Nyuwo muri vakhiviruxa okathi ula. Miyo nkinaasuwela t'ani awo. Nkisuwenle sintoko ookhala mmosa va, masi kinnoona weettiheriwa wira koovekeleni Nyuwo. Kahi wira atthu akiwe, okhala wira eyo yaamukhala eyiirelo ya enamirima miili. Muluku ahitthuniherye. Nkintthuna okhala namirima miili. Masi kinvekela ni exariya mmurimani mwaka, Pwiya.

229 Onakhaleru pani mulopwana wala muthiyana Nyuwo mulavunlyanyu ni yoowo voosiis'ula, voowiiyeviha awo ehuuliwe muru, masi ewaakheleni Nyuwo vathi mmurimani mwaya naanaano va, erwaaka ohiy'ula wira epatisiwe mwa Nsina na Yesu Kristu, attharaka khula Masu, khula Masu; vakhala wira apatisiwe voovirikana, wala omiseriwa, oyeheriwa. Muupuwele (hiyo ninniira, Pwiya) wira Nyuwo moohimya, "Ole onrowa okumiha Nuulumo nimosi Muliivuruni, waacererya—Mo nuulumo nimosi, mpantte awe onookumihiwa Muliivuruni mw'Ekumi." Hata eereryaka, orwa, ohela nsina nawe muliivuruni, eyo—eyo khenrowa ovara etthu. Munitthuniherye nikhale anaxariya ni oowiiyeviha.

230 Vano awo ari mmatatani mw'Anyu, Pwiya. Nyuwo mwiire ni yaawo ntoko sinoonaanyu ophwanelela, okhala wira t'Awinyu. Mwa Nsina na Yesu Kristu, Mwaana a Muluku.

<sup>231</sup> Vano nitrine-ene miru sahu sowuurama, kintthuna mutthokelele saana vano. Kinniveka muswammaha, toko, mwaha wo opisa minuutu soophiyaka muloko ni mithanu. Vano nintthuna niipe vathi-vathi. Nto nyuwo muupuwele paahi mmurimani mwanyu vano, “Kiireke tthiri koomusuwela Muluku?” Muupuwele paahi vaxariya-vo saana vano. Okhala wira, khasinihala imaara sinci-enexa khino mpakha... Ola pooti okhala okathi wookiserya, onthukumanaahu ohinatthi Orwa Wawe. Eri vakhiviru, apatthani. Enkhala ntoko, khula Yoolempwa, yoomaliheriwa. Ni vaamuweryaneya okhala, wa nyuwo wala miyo, vaamuweryaneya ola okhala okathi ahu wookiserya. Khino vaamuweryaneya hiyo ohikhala ohinatthi ophiya ohiyu.

Kinoorowa ni Yoowo, ni Yoowo mpakha wookiseryani.

Kinniwerya wiiwa . . .

“Nyuwo munnuuliwa muru mwaha wa Miyo ni Masu Aka?”

Kinniwerya omwiiwa Moopoli aka . . .

<sup>232</sup> Vano mutthokelele paahi vano wira mwaakhanle voolilini mukhwaaka.

. . .kinniwerya wiiwa . . .

Vano vaamuwerya okhala vaxiye-ene saana, masi kahi naanaano va.

“Mukuxe mwiikimanyo anyu, ni . . .”

Khino mwaahaana wiivahererya naanaano va.

“ . . .mukitthare.”

Vano, mmurimani mwanyu, mwaakhule ela:

Kinoorowa ni Yoowo ovira ematta,  
Knoorowa ni Yoowo ovira ematta,  
Kinoorowa ni Yoowo ovira ematta,  
Knoorowa ni Yoowo, ni Yoowo yothene . . .

<sup>233</sup> Vano ni miru sahu sowuurama, nrowe nivenxe matata niire:

Knoorowa ni Yoowo ovira molamuliwani,

Vano, ti yeeyo eniiraneya naanaano va: Owo onoonilamula.

Kinoorowa . . .

Pwiya, Nyuwo munikiphwanya oottheka? Vano, mukilevelele.

. . .mwa olamula Wawe,

Nlamulo nanyu ti nvi wa miyo voosiis’ula, Pwiya?

. . .ni Yoowo ovira moolamuliwani . . .

Mukehererye, Pwiya, moone yaakhanle-ene etthu yootakhala mwa miyo.

. . .ni Yoowo, ni Yoowo mpakha wookiseryani.

234 Tithi, hiyo ninnooxukhuruni Nyuwo voosiis'ula mwaha wa matata ala othene. Miyo nkimonne mutthu mmosa ohivenxale matata awe. Miyo kinnooxukhuruni Nyuwo, Pwiya. Miyo—miyo kinroromela wira ni Nyuwo, Pwiya. Khaavo mutthu ohivenxale matata, awo aalikana wira evire moolamuliwani. Munilevelele, Pwiya. Ni yaakhanle-ene etthu evonyeye mwa hiyo, munilevelele mwaha wa yeeyo, Tithi. Munivahe omoriwa Wanyu ikharari, okhala wira khaninthuna okumana ni olamula Wanyu okathi omoriwa ikharari ohinrowaya okhala. Tivo, okhanle-ene omoreliwa ikharari naanano va, vano ninnivekela, Muluku, wira Nyuwo munilamule ni munilevelele itampi sahu, voolikana ni Masu Anyu ni natiri Anyu. Ni munitthuniherye wira nikhaleke mwaha wa Nyuwo mahiku othene a ekumi ahu, nihuuleliwaka muru Ehapari yooreera.

235 Vano, Tithi, wakhala otthuna Wanyu, hiyo ninrowa opacerya Ittiminku tthaaru sootharana vano, sa mithukumano. Mulikanyiherye mirima sahu yeeyo, Pwiya. Mukilikanyihe, O Muluku. Miyo ka ole ohinreere woothunani voowiixerya Nyuwo. Kinvekela wira mukihooolele ni mukeettiherye mwa itthu kirinaaka wira ni ohimya, mahiku ala anrwa.

236 Mmuhoolele ni mmweettiherye Munn'ihu oophenteya Neville, murumeyi Anyu owo oominyala, Pwiya; ni nave-tho Munna Mann, ni matiyaakono a ekereja, ni maatiministratoore, ni khula mutthu onthukumana va.

237 Munilikanyihe, Pwiya, wira niwerye, mwa e—enamuna y'ekeekhai y'eKristu, naaruuhe anatampi wa Nyuwo, ni naaruuhe mamempuru a ekereja wira emusuwele Muluku ommusuwelahu, nimusuwenle ahu voomeekha, mutthuniherye wira Owo akhale Muluku aya, nave. Vano, Tithi, ela hiyo khaninwerya wira, hiyo khaninwerya waakeliha. Masi Nyuwo, Erooho Yoowaarya, mweetteette v'atthuni, mamempuru a ikereja.

238 Ni ntoko musuwelelo mwaamukhaani kaakhalanne aka ni Nyuwo voosiis'ule, "Murowe mmurowele Mwaakameliwa a Mwan'aka. Mmukuxe Yoowo eriyari y'atthu, eriyari ya ikereja. Mmukumihe Mwaakameliwa owo." Mukitthuniherye, mmavekeloni vano, Pwiya. Munvelelihe Rapeka; kinoophavela okhala Eliyeseri. Mukikhaliherye okhala murumeyi oororomeleya. Ni wira Muluku a Wirimu aveleelihe Nlaikha Nawe ohoolo waka, ohoolo wahu, wira nitakaihe itthu vamosa ni nimuthanle Mwaakameliwa Owo omuthanlale awe. Hiyo ninvekela mwa Nsina na Yesu. Amen.

239 Vano, kinnoona othunku woopisihani vakhani. Soovira minuutu miloko miili ni mithanu. Kaahaana wira kikhumme, minuutu miloko miili ni mithanu sivinre. Masi, vano, ninnoosivelani nsipo nle na khalayi, "Mukuxe Nsina Na Yesu Ni Nyuwo"? [Muthukumano oniira, "Amen."—Mol.] Khanihyo

nooreera? Kinniipaka nenlo vano mwa miyaakha miloko miraru ni miraru, ntoko nsipo n'olaxeryana. Opatiiso wa mmaasini, "Keemenle mukerekhere mwa Yordani a mwanankhaya." Ni kinoona wira nla ti nooreera saana, "Mukuxe paahi mapuro othene onrowaanyu!"

Nsina nooreeraxa, O noosivela!  
Nroromelo . . .

Vano nvahane matata ni mutthu ori vakhiviru ni nyuwo.

Nsina nooreeraxa, (Nsina nooreeraxa!) O  
noosivela!  
Nroromelo wa mulaponi ni ohakalala wa  
Wirimu.

<sup>240</sup> Vano muupuwele muteko wa olelo ohiyu, ewoora yaaneethanu neili ni minuutu miloko miraru, ewoora yaneethanu neili ni minuutu miloko miraru olelo ohiyu. Vano nrowe niipe eversu ila emosa, moone:

Mukuxe Nsina na Yesu ni nyuwo,  
Ntoko mwaakiheryo wa khula muraakho;  
Okathi ottehattehiwa onoorukureyayani. . .  
(Muniira exeeni nto?)  
Muromole Nsina nenlo Noowaarya ni  
mavekelo.

Nsina nooreeraxa, O noosivela!  
Nroromelo wa mulaponi ni ohakalala wa  
Wirimu;  
Nsina nooreeraxa, O noosivela!  
Nroromelo wa mulaponi ni ohakalala wa  
Wirimu.

<sup>241</sup> Aahikhala mutthu aarwiiye wira apatisiwe nuumala muteko ola? Vakhala siiso, nvenxe matata. Ookhala onrowa opatisiwa? Aili, vaareera, anrowa opatisiwa naanaanoru numala muteko ola. Vakhala wira akina, khula a nyuwo onthhuna opatisiwa, ninoorowa okhalana miteko s'opatiiso wa khula mmosa wa miteko iya s'okokhorela. Etthu emosa paahi murinaanyu wira oveka. Noolikana wira noopatiseni. Owo ti muteko ahu, woopatisani mwa Nsina na Pwiy'ahu Yesu Kristu. Muteko ahu wira yeeyo. Ni ninootteeliwa murima wira, khula okathi. Nyuwo munrowa opatisiwa, murowe musaala, naanaanoru nuumala muteko, ni ninookelela nananaanoru opatiiso wa mmaasini. Khula mutthu onthhuna waatthara, musuwele wira hiyo nri va. . .mwaattharunwe-ene itampi sanyu ni wira moomukupali Yesu okhala Moopoli anyu.

<sup>242</sup> Munnikhhalaka muKristu mwa miyaakha, nave khimunatoko woona Waarya, nto vano Waarya wa ovuluxiwa ohoorwa. Muthiyana, Mwaakameliwa orina okuxaka Nsina! Yesu ohimye wira, "Miyu kiruule mwa Nsina n'Atithi Aka, nave nyuwo khamukaakhenle. Masi onookhala mmosa onrowa orwa

mwa nsina nawe yoowo, nto nyuwo munoomwaakhela,” owo muromolelo anyu.


<sup>243</sup> Khula mwaana onrwa mwa nsina n’atithi awe. Miyo kinoorwa mwa nsina n’atithi aka. Nyuwo axilopwana munrwa mwa nsina n’atithi anyu.

<sup>244</sup> Nto Nsina Nawe naari nvi, Nsina n’Atithi ti nvi? Yesu! Owo, “kirwiye mwa Nsina n’Atithi Aka, nyuwo khamukaakhenle.” Vano Mwaakameliwa Awe onrowa okhalana Nsina Nawe, vekeekhai.

<sup>245</sup> Miyo kimukunxe muthiyana mmosa, oniitthaniwa Broy, nto owo khukhala Branham.

<sup>246</sup> Owo onimurweela Mwaakameliwa, mukupali ni muupuwele yeeyo mwaarwaaka vatankini.

Nrowe nuurame muru ahu vano.

<sup>247</sup> Nto Munna Vayle va kahiyo muletto wa hiyo. Owo munna mmosa oophenteya saana, onnikhalaka ni miyo mmithukumanoni sinci-ene, owo ni amwaar’awe. Ni owo ti mulipa-oolipa mitthaka iya ni itthu sinkhuma mwa ntoko eliivuru. Munna Vayle, munilaxerye ni mavekelo, nuuramihaka muru ahu. [Munna Vayle onoovekela—Mol.] 

65-0711 Oowuuliwa Muru  
Branham Tabernacle  
Jeffersonville, Indiana wAmerika

EMAKHUWA

©2026 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyuwe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)